

Dill' wen dill' kob daa bzej

Juanna'

Beena' nak Xtill' Chioza' golje' goke' to beṇ'

1 ¹Ba zoakzə beena' le Xtill' Chios ka wxē wzil yog'loṭte dii de. ²Len' ba zoalene' Chioza', na' lekzen' Chioza', ²na' dezd nechte ba zoalenkze' Chioza'. ³Len' bene' yog'te dii de, na' biga de to dii bi bene'. ⁴Len' cho'e yel' mban, na' nake' beeni' che beṇ' yell-lioni. ⁵Na' beeni' che'na' chzeeni'n yell-lioni gani nak shgasj shchoḷ ni che dii mala', na' yel choḷa' bi bizoyin yisolan beeni'na'.

⁶Wzoa to beṇ' bseḷ' Chioza' wlie' Juan. ⁷Juanna' bidyee dill' che beena' nsa' beeni'na' kwenche yog' beṇ' gonḷilall'gake'ne'. ⁸Aga Juanna'yen'nan nsee beeni'na', san to bidtixje'ze' che beena' nsa' beeni'nan'. ⁹Beena' nsa' beeni'na' daa nak dowalj daa wzeeni'n lao yog'loḷ beṇ', ba zee yell-lioni.

¹⁰Na' beena' nsa' beeni'na' bidsoe' yell-lioni, na' la'kzi le' bxe bsile' yell-lioni, beṇ'ka' lle' lawinna' aga gokbe'gakile' non nake'. ¹¹Blline' ladj beṇ'ka' nak beṇ' yell che', na' legake' bi blebgake'ne'. ¹²Per yog' beṇ'ka' blebgake'ne' na' beṇ'ḷilall'gake'ne', bene' legake' xiin Chios. ¹³Na' aga daa nakgake' beṇ' de beli chenān, wa daa cheeni beṇ' soalen lḷjwellen', ni aga daa cheeni beṇ' soa xiinen', san daa beṇ'ḷilall'gake'nen' gokgake' xiin Chios.

¹⁴Na' beena' le Xtill' Chios golje' goke' to beṇ' de beli chen na' wzoe' ladjnto'ni. Na' ble'into'ne' nake' beṇ' zakii nḷleb daa nake' Xiin tlish' tyaj Xacho Chioza', na' nake' beṇ' lall'do' xen inḷleb na' bli'e do ka nak dii ḷina'. ¹⁵Na' Juanna' bi'e dill' che' wne':

—Che beenin bzajniid' le' kana' wnia': “Beena' zi' za' nake' beṇ' zak'chi aga ka nad', la' ba zoakze' kana' zi' soa' nad'.”

¹⁶Daa nake' beṇ' wen inḷleb na' daa chakchgaile' cho', dii zan dii wenka' ba bene' che yog'cho. ¹⁷Dii Moiséza' bzajniile'

cho' diika' bllia Chioza' bia' goncho; per Jesucrístona' bli'e yel' chiyesh'lalli che Chioza' len dii li che'na'. ¹⁸Ni to konon' ile'i Chioza', per Xiine'na' nak tlish' tyaj, beena' zoalene'ne', len' bidliile' cho' ka nake'.

Juanna', beena' bchoa ben' nisa', bi'e xtill' Jesucrístona'

(Mt. 3:11-12; Mr. 1:7-8; Lc. 3:15-17)

¹⁹Ben' wñabia' che ben' Israelka' lle' Jerusalénna' bsel'gake' to chop bñoz na' sto chop ben'ka' nak xiin' dia che dii Levína' kwenche janabgakile' Juanna' non nake'. ²⁰Na' bi bkwashee non nake', san golle' legake':

—Aga nadaan Crístona', beena' chbezcho wsel' Chioza'.

²¹Na'ch wiznabgakile'ne':

—¿Norakzan nako' shka'? ¿Alin' Elíaza', beena' wdixjee daa goll Chioza'ne' kani'yi?

Na' Juanna' chi'e:

—Aga le' nad'.

Na'ch chize'gake'ne':

—¿Alin' beena' ba llia bia' yid kwenche chixji'e daa che' Chioza'ne', shka'?

Na' che' Juanna':

—Akza le' nad'.

²²Na'ch che'gake'ne':

—¿Norakzə li', shka'? Cheeninto' inezinto' kwenche lljayellnto' ben'ka' bsel' neto' non nako'. ¿Bi ka ino' che kwino'?

²³Na'ch che' Juanna' legake':

—Dii Isaíaza', beena' wdixjee daa goll Chioza'ne' kani'yi, dill' chan' bi'e kana' wne': “To ben' gosyee zillj latja' gana' bibi chashj chleb, na' ine': Li se kwas kwenche wzenagle che Xanchona' kat' zee.”

²⁴Na' ben'ka' bsel' fariseoka' ²⁵wñabgakile'ne':

—¿Berache chchoazo' ben' nis shi aga lin' Crístona', ni Elíaza', ni beena' llia bia' wsel' Chioza' kwenche chixji'e daa chi'ene'?

²⁶Na' che' Juanna' legake':

—Nad' chchoa' ben' nis, per ladjleni zoa to ben' bi nombia'le, ²⁷na' len' zi' wli'lawe'. Na' nad' ni bi zakaa gak' xmose' kwenche galj' la'ch' xele'na'.

28Yog' diiki gok gana' le Betania, daa llia sh_laa yao Jordanna', gana' bchoa Juanna' be_n' nisa'.

Jesúza', beena' bse_l' Chioza', zaklebile' xil'do'na' chitgake'

29Na' betiyo ble'i Juanna' Jesúza' zeje' kwite'na', na' chi'e:

—Li wwia, beenin bse_l' Chioza' na' zaklebile' xil'do'na' chitcho, la' len' yikwase' saaxya che be_n' yell-lioni. 30Na' xtill' beenin bi'a kana' wnia': “Zi' za' to be_n' zak'chi ka nad', na' ba zoakz beeni kana' zi' soa.” 31Ni nad' bi w_nezid' no xtilliin bi'a, per kwenche gombia' be_n' Israelki le', bidchoa' be_n' nis.

32Na' Juanna' wizne':

—Ble'id' Espíritu che Chioza' betje' yabana' nake' ka to palom na' jsoalene' le'. 33La' ni nad' bi w_nezid' no xtilliin bi'a, per Chioza', beena' bse_l' nad' chchoa' be_n' nis, wne': “Ile'ilo' yetj Espíritu cha'na' lljsoalene' beena' wlej', na' len' gone' ka yidsoa Espíritu Sántona' loo yichjall'do' be_n’.” 34Ba ble'id' gok ka wna Chioza' nad', na' naa nia' le' beenin Xiin Chioza'.

Be_n'ka' bengake' Jesúza' txen dii nech

35Na' betiyo Juanna' zelene' chop be_n'ka' nakgake'ne' txen.

36Na' ka ble'ile' chda Jesúza' na', na'ch chi'e:

—Li wwia, beenin bse_l' Chioza' na' zaklebile' xil'do'na' chitcho kwenche chiyakxen saaxya chechoka'.

37Na' chop be_n'ka' nak Juanna' txen, ka bengakile' wna Juanna' ka', na' janogake' Jesúza'. 38Na'ch ka biyechj Jesúza', ble'ile' zjanogake'ne' na' chi'e legake':

—¿Bin cheenile?

Na' che'gake'ne':

—Rabí, ¿garan zo'?

(Na' Rabí zejín: be_n' chli' chsedi be_n’.) 39Na' che' Jesúza':

—Li da wwiale.

Na'ch wyajlengake'ne' na' jale'gakile' gana' zoe', na' bigaanlengake'ne' axt ka wde llana', la' ka do chida tapan billinlengake'ne' gana' zoe'.

40Na' beena' le Andrés, be_n' bish' Simón Pédrona', len sto be_n' yoblə gokgake' chopə janogake' Jesúza' ka bengakile' daa wna Juanna' che'. 41Na' Andréza' lli jadjiltjie' be_n' bishee Simónna',

na' chi'ene':

—Ba billeminto' beena' nak Mesíaza'—. Na' Mesías zejín Cristo, beena' chbezgake' wse! Chioza' kwenche inabi'e.

42 Na'ch Andréza' bchi'e Simónna' gana' zoa Jesúza', na' ka ble'i Jesúza'ne', chi'ene':

—Lin' Simón, xiin Jonáza', na' naa yilio' Cefas—. Na' Cefas zejín Pedro.

Jesúza' golle' Felípena' len Natanaela' gaggake'ne' txen

43 Na' betiyo ka zi' yiyaj Jesúza' gana' mbani Galileana', billague' Felípena' na' chi'ene':

—Da dino nad'.

44 Felípena' nake' ben' yell Betsaida, gana' nak lall Andréza' na' Pédróna'. 45 Na'ch jadjilj Felípena' Natanaela' na' chi'ene':

—Ba billeminto' beena' bzej dii Moiséza' xtilleena' lee libr che leya'. Na' lekzka' chen' bzej dii ben'ka' wdixjee daa goll Chioza' legake' kani'yi. Len' Jesúza', ben' Nazareta', xiin Joséna'.

46 Na' Natanaela' chi'ene':

—¿Aka Nazareta' ichej to ben' zakii?

Na' Felípena' golle'ne':

—Dakachi kwenche gakbe'ilo'.

47 Na' ka ble'i Jesúza' zej Natanaela' gana' zie', golle':

—Ni za' to ben' nak dowalj ben' Israel, to ben' bi nak ben' wxiye'.

48 Na'ch goll Natanaela'ne':

—¿Nakra chak nombi'o nad'?

Na' Jesúza' golle'ne':

—Ka zi' yidnelə Felípena' li, ble'id' li' xan yag yixwewa'.

49 Na' goll Natanaela'ne':

—Maestro, lin' nako' Xiin Chioza'. Na' lin' beena' zidnabia' neto' ben' Israel.

50 Na' goll Jesúza'ne':

—¿Aadaa wnia' ble'id' li' xan yag yixwewan' chajli'o cha'? Zi' ile'chilo' dii xench aga ka dga.

51 Na' lekzka' gollch Jesúza':

—Dii li nia' le', ile'ile yabana' nyaljan, na' ben'ka' nak anjl che Chioza' chep chetjgake' lawa', nad', Ben' Bsel' Chioza' Yell-lioni.

Got' to wishagna' yella' le Caná

2 ¹Na' biyōn lla got' to wishagna' yella' le Caná daa llia gana' mbani Galileana', na' na' len x̄na' Jesúza'. ²Na' l̄ekzka' goxgake' Jesúza' na' ben'ka' nakgake'ne' txen. ³Na' shlak chak l̄nina' bibill vino che'ka', na' goll x̄na' Jesúza'ne':

—Ba bibill vino che ben'ki.

⁴Na'ch che' Jesúza'ne':

—¿Berache nazo' nad' ka'? Bin' gal' gon' daa llia bia' gon'.

⁵Per x̄neena' golle' wen mandadka':

—Li gon kon bin in̄e' le'.

⁶Na' na' zoa x̄op yes' xen de yaj, dii choll nis, diika' chon llin kat' ben' Israelka' chixi chiyechgake' kon ka na ley che'ka'. Na' to to yes'ka' chollan ka do shōn yid nis. ⁷Na' che' Jesúza' wen mandadka':

—Li kaa nisa' loo yes'ki.

Na' wda'gake'n axt ka billa'chagakan. ⁸Na'ch che' Jesúza' legake':

—Li gash' lataan naa na' li lljeen beena' ngoo lo neen.

Na' bengake' ka golle'. ⁹Na' beena' ngoo lo neen bnix̄e' nisa' daa biyak vino, ni bi nezile' ga wza'n. Tochga wen mandadka' nezgakile', la' legaken' wdaagake' nisa'. Na'ch beena' ngoo lo neen goxe' bi'na' chshagna', ¹⁰chi'eb':

—Yog' ben' zigaate chdie' vino wenna', na' kat' ba weej ben'ka' len l̄nina' dii zil, na'ch chdie' daa bi naktek wen. San li', ba bzagoo vino wenni na' axt naach chdio'n.

¹¹Yel' waki dga ben Jesúza' yell Canána' daa llia gana' mbani Galileana', l̄ennan' bene' dii nech. Na' ka' bli'e yel' wak che'na' nape', na'ch ben'ka' nongake' le' txen ben'li'lall'gake'ne'.

¹²Na' ka wde, biyaje' Capernaúma' len x̄neena', len ben' bisheeka' na' len ben'ka' nakgake'ne' txen, na' wzoagake' na' to chōp shōn lla.

Bishesh Jesúza' ben'ka' chit' chde lesh' chyoodo'na'

(Mt. 21:12-13; Mr. 11:15-18; Lc. 19:45-46)

¹³Na' ka ba zoa gal' l̄ni Paskwa' daa chon ben' Israelka', wyaj Jesúza' Jerusaléna'. ¹⁴Na' ka blline' lesh' chyoodo'na', ble'ile' lle'

ben' chit'gake' goon, xil', na' palom, na' lekzka' na' chi' ben'ka' chisha' mecha'. ¹⁵Na' ka ble'ile' ka chak, bene' to do tashj, na' kon len bisheshile' yog'löle' lesh' chyoodo'na' lente goonka' na' xil'ka'. Na' bzalee xmech ben'ka' chisha' mecha' lo yona' na' bishi'e mes che'ka'. ¹⁶Na' ben'ka' chit' palomka', golle' legake':
—¿Li yishesh baki ni! ¿Bi gonzle lill Xa'na' ka lao yaa!

¹⁷Na'ch ben'ka' nakgake'ne' txen jadingakile' Cho'a Xtill' Chioza' gana' nan: “Daa le chakid' lill xlatjo'na' len wliayi'n nad'.”

¹⁸Na'ch ben' Israelka' lle' na' che'gake' Jesúsza':
—¿Bi ye!' wak gono' dii wli'n napo' ye!' wñabia' kwenche chono' diiki?

¹⁹Na' che' Jesúsza' legake':

—Li yichinj yoodo'ni na' lo shonə llazə yiyona'n.

²⁰Na'ch che' ben' Israelka' le':

—Xopiyon yiz bengake' yoodo'ni, na' li' nazo' shonə llazə yiyono'n.

²¹Per daa goll Jesúsza' legake' ka', kwerp che'nan' bsaklebile' yoodo'na'. ²²Na'ch ka biban Jesúsza' ladj ben' wetka', jadini ben'ka' nakgake'ne' txen daa wne', na' wyajle'gake' Cho'a Xtill' Chioza' na' dill'ka' be' Jesúsza'.

Nombia' Jesúsza' yichjlall'do' yog'cho

²³Na' shlak zoa Jesúsza' lni Paskwa' Jerusalénna', ben' zan wyajle'gake' che' daa ble'gakile' ye!' wakka' bene'. ²⁴Per Jesúsza' bi bñenilallee legake', la' nombi'e yichjlall'do' yog'löl ben'. ²⁵Aga byalljile' no yee le' nakan nak benecha', la' kwaslöl nombi'e yichjlall'do'eka'.

Jesúza' bshaljlene' Nicodémona'

3 ¹Wzoa to fariseo ben' wle Nicodemo, na' goke' to ben' wñabia' ladj ben' Israelka'. ²Na' Nicodémona' wyaje' jawie' Jesúsza' wal-lə na' chi'ene':

—Maestro, nezinto' Chioza' bselee li' kwenche wli' wsedilo' neto', la' bi gak gono' ye!' wakka' chono' shel' bi zoalen Chioza' li'.

³Na'ch Jesúsza' chi'ene':

—Dii li nia' li', beena' bi yiyalj dii yoblə aga wak lljazoe' gana' chñabia' Chioza'.

4Na' che' Nicodémona'ne':

—¿Nakra gon to ben' gol yiyalje' dii yoblə? La' aga wak yiyoe' loo lee xneena' kwenche yiyalje' sto shii.

5Na' Jesúza' chi'ene':

—Dii li nia' li', kono gak yiyaj gana' zoa Chioza' chnabi'e shi bin' galjlenile' nis^a na' yikob Espíritu che Chioza' yichjlall'do'ena' kwenche gake' ka ben' galj sto shii. 6Beena' nak xiin ben' de beli chen, de beli chenchokzan nake'. Per beena' chikob Espíritu che Chioza'ne', nake' xiin Chios na' de to yel' mban che' daa bi te cheyin. 7Bi yibanilo' daa nia' li': "Yog' ben' chiyal' galje' dii yoblə." 8Kat' chze be'na' na' chajan kon ga cheenin, na' la'kzi chenicho ka sshag chonan aga nezicho galan za'n, ni bi nezicho galan zejan. Lekzkan' aga nezicho nakan chon Espíritu che Chioza' kwenche chiyalj ben' dii yoblə.

9Na'ch wiznabi Nicodémona'ne':

—¿Nakra gak gakz dga?

10Na' che' Jesúza'ne':

—Len naktio' to ben' chli' chsedi ben' Israelki, ¿ana' bi nezilo' diiki? 11Dii li nia' li', choe'nto' dill' che daa nezinto' na' daa ben ble'into', per bi chajle'le daa nanto' le'. 12Shi bi chajle'le daa wnia' le' che diika' chak yell-lioni, ¿alechlə shi we'len' le' dill' che daa nak che yabana'?

13'Ni to konon' shep yabana', toz nad', Ben' Bsel' Chioza' Yell-lioni, nak' ben' za' yabana'. 14Na' ka ben dii Moiséza' gana' bibi chashj chleb bdee bel' de broncena' lee yaga', ka'kzan gongakile' nad', Ben' Bsel' Chioza' Yell-lioni. Wda'gake' nad' lee yaga' 15kwenche nottez ben' gonlilall' nad' bi kwiayee, san gat' to yel' mban che' zejli kani.

Chaki Chioza' yog' ben' yell-lio

16'Daa le chakchgayi Chioza' ben' yell-lioni, bselee Xiine'na' tlish' tyaj kwenche nottez ben' gonlilalleene' bi kwiayee, san gat' yel' mban che' zejli kani. 17Chioza' bselee xiine'na' yell-lioni aga kwenche wlliyee benaan, san kwenche yisle' legaken'.

^a 3:5 *Galjlenile' nis*: bal ben'ka' nsed nagake' zejin daa chochocho nisa', na' zi balgake' nagake' zejin nisa' daa chzani xna'chona' cho', na' zi balgake' nagake' zejin daa chixis chiyib Espírituna' cho' kat' chonlilall'cho Crístona'.

18'Beena' nonlilall' Xiin Chioza', bich nchoglo che' sak'zi'e, san beena' bi nonlilalleene', ba nchoglo che' kwiayee daa bi nonlilallee Xiin tlish' tyaj Chioza'. 19Ba nchoglo kwiayi' ben' yell-lioni daa ba bla' beena' nsa' beeni'na', na' daa chongake' dii mala', wyazlall'chgake' yel chol'a' aga ka beeni'na'. 20Yog' ben'ka' chon diika' bi yejni'alalii chakzbangakile' beeni'na', na' aga willjabig'lat'gake' lawinna' daa chlllegake' wli'lawi dii mala' chongake'. 21San ben'ka' zoagake' chongake' ka na dill' li che Chioza', chbig'gake' lao beeni' che'na' kwenche gakbia' chongake' ka cheeni Chioza'.

Juanna', beena' bchoa ben' nisa', be'che' xtill' Jesús'a'

22Ka wde, wyaj Jesús'a' Judeana' len ben'ka' nakgake'ne' txen na' wzoagake' na' xtit wen, na' bchoagake' ben' nis. 23Na' Juanna' lekzka' chchoe' ben' nis gana' le Enón, gaozə gana' le Salim, la' na' de nis zil, na' chaj ben' kwenche chchoe' legake' nisa'. 24Diiki gokgakan kana' zi' koogake' Juanna' lillyana'.

25Na'ch ben'ka' nakgake' Juanna' txen gokdil-lengake' sto ben' Israel ni cheyi diika' yoologake' chongake' kwenche chixi chiyechgake' lao Chioza'. 26Na' wyajgake' jellgake' Juanna':

—Maestro, beena' wzeleno' shlaa yao Jordanna', beena' bi'o xtilleena', ba chchoe' ben' nis na' yog'zə ben' chajgake' kwite'na'.

27Na'ch che' Juanna' legake':

—Kono gak bi gon shi Chioza' bi wi'e latj. 28Kwinkzle benile kana' wnia' aga nadaan Crístona', beena' chbezcho wsel' Chioza', san nak' to ben' bselee kwenche kwialoa' lawe'na' na' yep' ben' wzenaggake' che'. 29To ga chak wishagna', bi'na' chshagnan' ikaab' noola'. Na' bi'na' nllaguib' chi'b' kwitbaa, le chibaib' ka chenib' chshaljb'. Kayen'nan chak cha', le chibaid' daa chzenaggake' che Crístona'. 30Len' zizikchli seyi che', na' nad' bichtek seyi cha'.

Beena' za' yabana'

31'Ka nak beena' za' yabana', len' zak'chi' aga ka yog'lol ben'. Na' ben'ka' lle' yell-lioni, chinogake' daa de lo yell-lionizə, na' che yell-lionizə choe'gake' dill'. San beena' za' yabana' zak'che' aga ka yog'lolte ben', 32na' choe' dill' cheyi diika' ba ben ble'ile'

yabana', per ba_lchga be_n' chajle' xtilleena'. ³³Na' nottez beena' chajle' che', chli'e Chioza' cho'e dill' li. ³⁴Beena' bse_l' Chioza', cho'a xtill' Chiozan' cho'e, la' Chioza' no'ene' do ka nak Espíritu che'na'. ³⁵Chioza' chakile' Xiine'na', na' ba bene' lall' nee yog'lo_lte dii de. ³⁶Na' beena' gon_lilall' Xiin Chioza' gat' ye_l' mban che' zej_li ka_ni. Per beena' bi cheeni gon_lilalleene' bi gat' ye_l' mban che' zej_li ka_ni, san ile'ile' ye_l' zak'zi'na' we' Chioza'.

Bshaljlen Jesúza' to nool Samaria

4 ¹Fariseoka' gokbe'gakile' be_n' zanch nakgake' Jesúza' txen, na' be_n' zanch chchoe' nisa' aga ka Juanna', ²la'kzi aga kwín Jesúzan' bchoe' be_n' nisa', san be_n'ka' nakgake'ne' txenan. ³Na' ka gokbe'i Jesúza' ba nezi fariseoka' be_n' zanch nakgake'ne' txen, na'ch bizee gana' mbani Judeana' ziyaje' gana' mbani Galiléana'lə.

⁴Na' kwenche yilline' gana' mbani Galileana' chiya_l' yidie' gana' mbani Samáriana'. ⁵Na' billingake' to yell dii le Sicar, daa llia gana' mbani Samáriana'. Na' yella' llian gaozə gana' de yell-liona' be' dii Jacoba' xiine' dii Joséna'. ⁶Na' lo yell-liona' llia posa' wden dii Jacoba'. Na'ch wche' Jesúza' cho'a posa' daa ba chjxakchgaile' zingwee neza'. Na' ba chonan ka gobill. ⁷⁻⁸Na' be_n'ka' nakgake'ne' txen zejgake' yella' zjxi'gake' daa gaolengake'ne'. Na' cho'a posa' chi' Jesúza' ka bllin to noolə Samaria zjxi'e nisa'. Na' che' Jesúza'ne':

—Be_n lat' nis yeej'.

⁹Na'ch che' noolə Samáriana'ne':

—¿Berache chnabzilo' nad' nisa' yeejo'?, la' be_n' Israel li', na' nool Samaria nad'.

Golle' ka' la' be_n' Israelka' bi zoalengake' wen be_n' Samáriaka'. ¹⁰Na'ch che' Jesúza'ne':

—She_l'ka' nezshailo' daa cho_n Chioza' na' no nad' chnabid' li' nisa' yeej', ba wnabilo' nad' gon daa yeejo', she_l'ka', la' nap' to nis yaa nis ban daa gon li'.

¹¹Na' noola' chi'ene':

—Be_n'do', bibi noxoo wlepilo' nisa', na' posi le zitjan. ¿Gara lljxi'o nis yaa nis banna' gon' nad' nazo' ka'? ¹²Dii xozxto'cho Jacoba' bkwaanlene' neto' posi gani weeje', na' weej xiine'ka'



To cho'a pos gana' chbejgake' nisa'.

na' bayix' che'ka'. ¿Achakilo' zak'chilo' ka le'?

13Na' che' Jesúza'ne':

—Nottezə ben' cheeje' nis che posi, wbiłchkzile' dii yoblə.

14San beena' yeej nisa' daa wi'ane', aga wbiłchile'. La' nisa' daa wi'ane' nakan ka to dii galchga loo yichjlall'do'ena' na' gonan ka gat' yel' mban che' zejli kani.

15Na'ch che' noola'ne':

—Ben'do', ben' nad' nisa' no' ka' kwenche bich ibilid' na' bich yid beja' ni.

16Na' che' Jesúza'ne':

—Biyaj jane ben' cho'na', na' dalene' ni.

17Na' che' noola'ne':

—Aga no ben' cha' zoa.

Na' Jesúza' chi'ene':

—Lekzilo' no' ka', aga no ben' cho' zoa. 18La' ba gok gay' ben' cho'ka', na' beena' zoaleno' naa ni bi nshagna'lenkzo'ne'. Shlikzan ba wnio'.

19 Na'ch noola' chi'ene':

—Ben'do', ba gokbe'id' nako' to ben' chyixjee daa na Chioza'.
20 Dii xozxto'nto'ka' be'la'ogake' Chioza' lo yaani, na' le' ben'
Israel nale chonan byen we'la'ochone' Jerusaléna'.

21 Na' che' Jesúsane':

—Noolə, wyajle' cha', wllin lla kat' bich gonan byen yidle lo yaani, ni bich gonan byen shajle Jerusaléna' kwenche we'la'ole Xacho Chioza'. 22 Le' ben' Samaria ni bi nombia'le non choe'la'ole, san neto' ben' Israel nombia'nto' Chioza', beena' choe'la'onto', la' ladjnto'nan' ichej beena' yisle' ben' kwenche bi kwiayi'gake'. 23 Ba zoa illin lla, wa ba bllinkz llana' ben'ka' dii li choe'la'ogake' Xacho Chioza' we'la'ogake' beena' nak dowalj Chios do yichj do lallgake', la' kan' chaklall' Xacho Chioza' we'la'ochone'. 24 Chioza' nake' Espíritu, na' ben'ka' cheengakile' we'la'ogake'ne', chiyal' we'la'ogake'ne' dowalj na' do yichj do lallgake'.

25 Na' che' noola'ne':

—Nezid' wla' beena' chbezcho wsel' Chioza' beena' nsi'e Mesías wa Cristo. Na' kat' yide', wzajniile' cho' yog' diiki.

26 Na' che' Jesúsane':

—Nad'kzan' beena' no' ka', na' len' chshaljlene' li'.

27 Na' shlak choe'lene' noola' dill', billin ben'ka' nakgake'ne' txen na' bibangakile' daa chshaljlen Jesúsane' to noolə. Per ni toe' bi biyaxji inabile'ne' bin cheeni noola' wa bi dillaan chshaljlene'ne'. 28 Na'ch noola' bkwaane' chee nis che'na' na'zə, na' biyaje' jayelle' ben' wlall che'ka':

29 —Li da lljawiacho to ben' ba wne' nad' yog' diika' ba ben'.
¿Aaga len' Crístona', lla?

30 Na'ch blleshgake' yella' wyajgake' gana' chi' Jesúsane'. 31 Na' shlak ziyaj noola' zeyid ben'ka' nak Jesúsane' txen che'gake'ne':

—Maestro, wdao lat'.

32 Na' Jesúsane' chi'e legake':

—De to yel' wao cha' daa bi nombia'le.

33 Na'ch che' lllwell ben'ka' nakgake'ne' txen:

—¿Anti no ba bidwa' dii wdawe', lla?

34 Na' che' Jesúsane' legake':

—Yel' wao cha'na' nakan daa chon' ka cheeni beena' bsel' nad' na' wzeeloa' daa cheenile' gon'. 35 Le' nazle: “Chyalljch zi

tap beo' kwenche yizi' yilapcho.” Per nad' nia' le', li wwiakachi ba de daa yizi' yilapcho. ³⁶Beena' chyixjee cho'a xtil' Chioza' naa, zaklebile' to beñ' ba chilalile' chizi' chilape'. Na' beñ'ka' chzenag daa chyixji'e, gat' to yel' mban chegake' zejli kani, na' beena' goz yibalenile' beena' chizi' chilap. ³⁷Nakan ka dillaa de daa na: “Beñ' yoblan chaz na' beñ' yoblə chizi' chilap.” ³⁸Nad' ba bselaa le' lljalaple gana' bi bllagole gozle, la' le' gonle ka wzenag beñ' cho'a xtil' Chioza' daa wdixjee beñ' yoblə.

³⁹Beñ' zan beñ' Samáriaka', beñ'ka' lle' yell Sicara' benlilall'gake' Jesúza' daa goll noola' legake': “Ba wne' nad' yog'te dii ba beñ'.” ⁴⁰Na'ch ka bllingake' gana' chi' Jesúza', got'yogakile'ne' kwenche yigaanlene' legake'. Na' bigaane' na' chop lla. ⁴¹Na' beñ' zanch benlilall'gake'ne' daa bengakile' dillaa cho'e. ⁴²Na'ch che'gake' noola':

—Naach ba chajle'nto', aga daa wnazo' neto' kan', san kwinkznton' ba beninto' cho'e dillaa na' nezinto' dii li lekzen' beena' yisla beñ' yell-lioni kwenche bi kwiayi'gake'.

Jesúza' biyone' xiin to beñ' wñabia'

⁴³Na' ka gok chop lla, bizee biyaje' gana' mbani Galileana'. ⁴⁴Kwinkz Jesúza' wne' nan to beñ' chyixjee daa che' Chioza'ne' aga no chgoo le' balaan lalle'na'. ⁴⁵Na' ka billine' gana' mbani Galileana', blebgake'ne' daa ble'gakile' yog' daa bene' Jerusaléna' ka gol' lni Paskwa'.

⁴⁶Na' dii yoblə wizaj Jesúza' yell Canána' daa llia gana' mbani Galileana', gana' biyone' nisa' vino. Na' yella' zoa to beñ' zakii beñ' chon llin che beñ' wñabia'na', na' zoa to xiine' bi' byo bi shao'b'. ⁴⁷Na' ka wñezile' ba billin Jesúza' Galileana' zizee Judeana'lə, na' wyaje' lawe'na' got'yoile'ne' shaje' lljayene' bi' che'na' daa ba chakshwetb'. ⁴⁸Na'ch che' Jesúza'ne':

—Aga wyajle'le cha' shi bibi yel' wak gon' ile'ile.

⁴⁹Na' beñ' wñabia'na' chi'ene':

—Beñ'do', ben goklen dagach naate, shategali bin' guet bi cha'na'.

⁵⁰Na'ch che' Jesúza'ne':

—Biyaj, jawia. Aga wet bi'na'.

Na' beena' wyajli'e daa goll Jesúza'ne' na' bizee. ⁵¹Na' ka ba

zoa yilline' lille'na' jatiḷ xmoṣe'ka' le', che'gake'ne':

—Ba biyaki bi' cho'na'.

52 Na'ch wṇabile' legake' ka do bi gor wzolo chiyakshao'lall'b'.
Na' che'gake'ne':

—Daa neji do ka chida to bichejb' dii lana'.

53 Na'ch gokbe'i xabaa biyakshao'lall'b' ka gora' goll Jesúza'ne':
“Biyaj jawia. Aga wet bi'na'.” Na' le' len yog' beṇ'ka' zoa lille'na'
benḷilall'gake' Jesúza'.

54 Dga gok de wchopi yeḷ' wakka' ben Jesúza' Galileana' ka zizee Judeana'.

Biyon Jesúza' to beṇ' net ṇi'a nee

5 1 Ka wde gok diiki, goḷ' to ḷṇi che beṇ' Israelka' Jerusalénna',
na' biyaj Jesúza' ḷṇina'. 2 Na' Jerusalénna', gaozə cho'a
puerta' le Puert Che Xil'ka' ḷḷia to tang dii le Betesda dill' hebreo.
Na' gay' koridor nechjan tanga'. 3 Na' ḷoo koridorka' de beṇ' zan
beṇ' we', no beṇ' lchol, no beṇ' bi chak sa' wen, na' no beṇ' net
ṇi'a nee, chbezgake' ta nisa'. 4 La' zoa kat' chetj to anjl cho'a
tanga' chte' nisa', na' beena' chyobi cho'e ḷoo nisa' chiyoll chta
anjla'n chiyakile' bittezə yillwe' che'ile'. 5 Na' ladj beṇ'ka' lle'
na' len to beṇ' ba gok shin'shonichoa yiz bi shawee. 6 Na' ble'i
Jesúza'ne' na' gokbe'ile' ba wlla die' ka', na'ch chi'ene':

—¿Acheenilo' yiyakilo'?

7 Na'ch beena' bi shao' chi'ene':

—Beṇ'do', aga no zoa cha' wletje' nad' ḷoo nisi kat' chdan.
Na' kat' chakid' yetj' ḷoo nisa', beṇ' yoblə lii chjsho'tie' ḷo'inna'.

8 Na'ch che' Jesúza'ne':

—Biyas, bitob daa cho'na' biyoa'n na' bigoo nez.

9 Na' katena' biyakile' na' lii bitobtie' daa che'na' biyo'en na'
bigwee nez. Gok dga ḷla sabda', ḷlana' chombaangake'. 10 Na'
beṇ'ka' chṇabia' beṇ' Israelka' gollgake' beena' biyaki:

—ḷla chombaanchō ṇaa. Aga bi lsens de woo daa cho'na'.

11 Na'ch che' beena' legake':

—Beena' biyone' nad' ḷen' wne': “Bitob daa cho'na' biyoa'n
na' bigoo nez.”

12 Na'ch che'gake'ne':

—¿Nora beena' wna li': “Bitob daa cho'na' biyoa'n na' bigoo nez”?

13Na' beena' biyaki aga nezile' non biyon le', la' Jesúza' ba bikwase' ladj ben'ka' lle' na'. 14Na'tech billag Jesúza'ne' lesh' chyoodo'na', na' chi'ene':

—Ba biyakilo' naa. Bich bi dii mal gono' kwenche ki wtilcho' dii walch.

15Na'ch beena' biyaje' lao ben' wñabia' che ben' Israelka' jayelle' legake' nan Jesúza' biyone'ne'. 16Na' daa ben Jesúza' yel' waka' lla sabda', llana' chombaangake', goklall'gake' witgake'ne'. 17Na' Jesúza' chi'e legake':

—Xa'na' bittezə lla chone' llin na' ka'kzə nad'.

18Na'ch ben' wñabia' che ben' Israelka' goklall'gake' witgake'ne' aga toz daa wdishje' leya' daa cho'en dill' che llana' chombaangake', san lekzka' daa chon kwine' ka Chios daa chi'e Chioza' nake' Xe'.

Yel' wñabia' daa nap Xiin Chioza'

19Na' Jesúza' chi'e legake':

—Dii li nia' le', nad', Xiin Chios, aga bi gak gon' tobia'loz', san daa chle'id' chon Xa'nan' lekzannan' chon'. 20La' Xa'na' chakile' nad' na' chliile' nad' yog' diika' chone'. Na' wli'chile' nad' dii zak'techlə ka diiki, dii gonan ka yibanchile. 21Ka chon Xa'na' chisbane' ben' wetka' na' chiyo'e yel' mban chegake', ka'kzə chon nad', Xiine', cho'a yel' mban che nottezə ben' cheenid' wi'an. 22Na' Xa'na' aga ga chhogloe' che ben', san nad' nak' Xiine', ba bene' lall' na' wchogloa' che yog'loł ben'. 23Bene' ka' kwenche yog' ben' koogake' nad' balaanna' ka daa chgoogake' Xa'na'. Beena' bi chgwee nad' balaan, nad' nak' Xiin Chios, lekzka' bi chgwee Xa'na' balaan, beena' bseł' nad'.

24'Dii li nia' le', beena' chzenag xtilaana' na' chonlilallee beena' bseł' nad', gat' yel' mban che' zejli kani. Na' aga bi de dii gonan ka choglo che' sak'zi'e, san ba bile' lo yel' wita' na' ba zoe' lo yel' mban daa bi te cheyin. 25Dii li nia' le', wllin lla kat' ben' wetka' yengakile' inia' legake', nad' nak' Xiin Chios, na' ben'ka' yengakile' kat' inia' na' yibangake'. 26Xa'na' nape' yel' wak kwenche wi'e yel' mban che ben' daa bi te cheyin. Ka'kzə ba bene' nad' Xiine' yel' wak kwenche wi'a yel' mban che ben' daa bi

te cheyin. 27 Na' lekzka' ba bene' nad' yel' wñabia' kwenche gon' yel' joschis daa nak' Ben' Bsel' Chioza' Yell-lioni. 28 Bi yibanile daa nia' ka', la' wllin lla wllin gor yeni yog'te ben' wetka' kat' inia' legake'. 29 Na' ka yengakile' inia' na'ch yichejgake' loo bana'. Na' ben'ka' ben dii wenna' yibangake' na' si'gake' banez to yel' mban daa bi te cheyin, na' ben'ka' ben dii mala', yibangake' na' choglo tegake' lo yel' zak'zi'na' zejli kani.

Jesúza' bli'e yel' wñabia' che'na'

30 'Ni to bibi gak gon' tobialoz', san chchogloa' che ben' kon ka nllia Chioza' bia' gon', na' kon ka nakannan' wchogloa'n. La' aga chon' kon ka cheenid', san daa cheeni Xa'na', beena' bsel' nad', lennan' chon'. 31 Na' shi nad' wi'a dill' che kwini, nezid' aga no shajle' cha'. 32 San zoa to ben' cho'e xtilaana', na' nezid' daa ne' cha' nakan shlichá. 33 Le' bsel'le ben' janabgakile' Juanna' bi ka ine' cha', na' dillaa daa bi'e cha' nakan dii li. 34 La'kzi nad' bi chyalljid' we' ben' yell-lioni xtilaa; nia' le' diiki kwenche yilale na' bi kwiayi'le. 35 Juanna' goke' ka to yi' dii bzeeni' na' le bibaile bzenagle che' tolde. 36 Daa chon' diika' non Xa' Chioza' lall' na' gon' choe'n dill' cha', na' zak'chin aga ka daa wna Juanna'. Na' chli'lawin Chiozan' bselee nad'. 37 Xa'na', beena' bsel' nad', lekzka' ba bi'e dill' cha'. Ni shlin bigan' yenile inie' ni bin' ile'ilene' nak nake'. 38 Na' cho'a xtilleena' bin' sho'n loo yichjlall'do'lena', la' bi chajle'le cha', nad' ben' bselee. 39 Le' chsedchgale Cho'a Xtill' Chioza' daa chakile le'inna' yillelile nakla ka gonle kwenche gat' yel' mban chele zejli kani. Na' la'kzi Cho'a Xtill' Chioza' choe'n xtilaana', 40 aga cheenile gakle nad' txen kwenche gat' yel' mban chele daa bi te cheyin.

41 'Aga chyalljid' no koo nad' balaan. 42 Na' nombia' le', na' nezid' aga chakile Chioza'. 43 Xa' Chioza' bselee nad' na' ba bid', na' bi chzenagle cha'. San shi yid ben' yoblə tobialoze', beena'lan le gak chele. 44 ¿Nakrakzə gonle shajle'le cha'? La' gangazə chgoo ljwell-le balaan, na' bi chinole sho'le balaan che beena' zeelo nak Chios. 45 Bi gakile nad' gaw' xya chele lao Xa' Chioza', la' zoa sto ben' gawe' xya chele. Dii Moiséza', beena' nonle lez gaklene' le', len' gawe' xya chele lao Xa' Chioza'. 46 La' shel' chajle'le daa

bzej dii Moiséza', lekzka' wyajle'le cha', shel'ka'. La' len' bzej' xtilaana'. ⁴⁷Na' daa bi chajle'le che daa bzej dii Moiséza', ¿nakra gonle shajle'le che diiki nia'?

Bwao Jesúza' wdeli gayaa mil ben'

(Mt. 14:13-21; Mr. 6:30-44; Lc. 9:10-17)

6 ¹Na' ka wde, Jesúza' wyaje' shlaa nido' che Galileana', daa lekzka' le nido' che Tiberias. ²Na' ben' zan janogake'ne' daa ble'gakile' yel' wakka' bene' kana' biyone' ben'ka' bi shao'. ³Na'ch wyep Jesúza' to lo yaa na' wche'lene' ben'ka' nakgake'ne' txen. ⁴Na' ba zoa gal' lni Paskw che ben' Israelka'. ⁵Ka ble'i Jesúza' ben' zan ba bliin gana' chi'e, na' chi'e Felípena':

—¿Gara lljxi'cho dii gao yog' ben'ki?

⁶Golle' ka' daa chakile' la'shki bi yee Felípena', la' ba nezkzile' nakan gone'. ⁷Na' Felípena' chi'ene':

—Aga waki laxj to ben' che xon' beo' lljxi'yicho dii gao yog' ben'ki lat' wej.

⁸Na' sto beena' nak Jesúza' txen lie' Andrés, ben' bish' Simón Pédróna', chi'ene':

⁹—Ni ze to bi' xkwid' no'ab' gay' yetxtil de cebada na' zi chop bel. Per bizə daa par yog' ben'ki.

¹⁰Na'ch Jesúza' chi'e:

—Li yee yog' ben'ka' kwe'gake'.

Na' dechga yixdo' gana' lle'gake', na' yog'tie' wche', na' to ben' byoka'zə gok ka do gayaa mil. ¹¹Na'ch bex' Jesúza' yetxtilka', na' bi'e Chioza' yel' choxken, na' bgone' che che ben'ka' nakgake'ne' txen na' legake' be'gake' che yog' ben'ka' chi' na' ax't ka bel'gakile'. Na' lekzka' bene' che bel'ka'. ¹²Na' ka bel'gakile', na'ch chi'e ben'ka' nakgake'ne' txen:

—Li yitop yog'loł dii lao'ka' bichoonan kwenche bibi gaktitj.

¹³Na'ch bitopgake'n, biyakte shllin xet' diika' bichoonan lao yetxtilka' gay'. ¹⁴Na' ka ble'i ben'ka' yel' waka' daa ben Jesúza', na'ch che' ljwellgake':

—Dii li beenin nake' beena' llia bia' yid yell-lioni kwenche chixji'e daa che' Chioza'ne'.

¹⁵Na' daa gokbe'i Jesúza' cheengakile' yiche'gake'ne' kwenche

wzoagake'ne' inabi'e legake', bicheje' ladje'ka' na' wyepe' toze' zi lat' cha'ch lo yaana'.

Wza' Jesúza' lo niso'dna'
(Mt. 14:22-27; Mr. 6:45-52)

16Ka ba cha_l, be_n'ka' nak Jesúza' txen biyetjgake' cho'a niso'dna'. 17Na' biyoogake' to loo barkw kwenche ziyajgake' yell Capernaúma'. Ba go_l na' bi_n' yillin Jesúza' kwite'ka'. 18Na'ch wzolo wzechga be'na' na' wzolo chas chat' niso'dna'. 19Na' ka do gay' wa xop kilómetro ba wza'len barkwa' legake' lo niso'dna' kat' ble'gakile' Jesúza' zeje' tlo niso'dna' zjatile' barkwa' na' le bblebgake'. 20Na' Jesúza' chi'e legake':

—Nad'kzan, ¡bi illeble!

21Na' chibagakile' bigoogake'ne' loo barkwa', na' lii bllintekzgake' gana' chwiagake' illingake'.

Zan be_n' chiyiljgake' Jesúza'

22Na' betiyo gokbe'i be_n'ka' bigaan sh_laa niso'dna' nan tochgá barkwa' got' na' to be_n'ka' nonz Jesúza' txen biyoogake'n na' bi len Jesúza' biyoole'ne' legake'. 23Na' gaozə gana' wdaogake' yetxtilka' ka wde be' Xancho Jesúza' Chioza' ye_l' choxken, bllin sto chop barkw dii za' yell Tibériaza'. 24Na' ka gokbe'i be_n'ka' aga no Jesúza' n_l'a' ni be_n'ka' nakgake'ne' txen, na'ch biyoogake' loo barkwka' ziyajgake' Capernaúma' jadiljgake'ne'.

Jesúza' nake' ka to ye_l' wao dii cho_n'a'n ye_l' mban

25Na' ka bllingake' sh_laa niso'dna' jadi'gake'ne', na' gollgake'ne':

—Maestro, ¿bat biyedo' ni?

26Na' Jesúza' chi'e legake':

—Dii li nia' le', chiyiljle nad' aga daa wyajni'lati'le bi zejín ye_l' wakka' benan', san daa wdaoze ax_t ka beljilen. 27Bi yila_l yizodzile kwenche gat' dii yeej gaole, la' dii te cheyin nak daa. San li ga_l' kwe'no daa go_n ye_l' mban chele zejli kan_i, daa go_n' nad', Be_n' Bse_l' Chioza' Yell-lioni. La' Xa' Chioza' ba bene'n lall' na' wi'an.

28Na' che'gake'ne':

—¿Beran chiyal' gonnto' kwenche gonnto' daa cheeni Chioza'?
29Na' che' Jesúza' legake':

—Daa cheeni Chioza' gonle, gonlilall'le nad', ben' bselee.

30Na'ch che'gake'ne':

—¿Bera yel' wak gono' ile'into' kwenche shajle'nto' cho'?
¿Bi ka gono'? 31Dii xoxxto'choka' wdaogake' daa le maná latja'
gana' bibi chashj chleb, ka na Cho'a Xtill' Chioza' gana' na: “Yel'
wawa' daa za' yabana' bi'en wdaogake!'”

32Na' che' Jesúza' legake':

—Dii li nia' le', aga dowaljyen' yel' wao daa za' yabanan' be'
dii Moiséza' legake', san Xa'na' chone' daa nak dowalj yel' wao
daa za' yabana'. 33La' nad', ben' za' yabana', nak' ka to yel' wao
dii choe' Chioza' ben' yell-lioki kwenche ibangake'!

34Na'ch che'gake'ne':

—Ben'do', bengach neto' toshiizi yel' wawa' no' ka'.

35Na' che' Jesúza' legake':

—Nad' nak' ka yel' wawa' daa choe'n yel' mban che ben'.
Beena' gake' nad' txen, gake' ka ben' nelj nlla'i toshiizi. Na'
beena' gonlilallee nad', gake' ka to ben' bichga ibili. 36Per kon
ka ba wnia' le', la'kzi ba ble'ile nad' bi chajle'le. 37Yog' ben'ka'
chon Xa'na' lall' na', gakgake' nad' txen. Na' beena' gake' nad'
txen aga wzoa'ne' ka'la. 38La' zaa yabana' na' zoa' yell-lioni
aga kwenche gon' daa nazan chan', san zaa kwenche gon' daa
cheeni Xa'na', beena' bsel' nad'. 39Na' Xa'na', beena' bsel' nad',
cheenile' bi wi'a latj kwiayi' ni to ben'ka' ba wleje' kwenche
gakgake' nad' txen. San cheenile' yisban' legake' ladj ben' wetka'
kat' illin lla te che yell-lioni. 40Na' dgan cheeni Xa'na', beena'
bsel' nad': chaklallee gat' yel' mban zejli kani che yog'lo' ben'
gakbe'i nak' Xiine' na' gonlilallee nad'. Na' nad' yisbanee ladj
ben' wetka' kat' te che yell-lioni.

41Na'ch ben' wñabia' che ben' Israelka' wzologake' biz chon
chnagake' che Jesúza' daa wne': “Nad' nak' yel' wao daa za'
yabana'.” 42Na' che'gake':

—¿Aaga beenin Jesús, xiin Joséna'? Nombia'cho xaxna' beeni.
¿Berache naze': “nad' za' yabana'”?

43Na'ch che' Jesúza' legake':

—Bibi gon inazle cheyi daa wnia' le'. 44Ni to kono gak gon

nad' txen shi Xa'na', beena' bse! nad', bi gone' le' lall' na'. Na' ben'ka' nak nad' txen, yisban' legake' kat' te che yell-lioni. ⁴⁵Lee librka' bzej dii ben'ka' wdxjee daa goll Chioza' legake' kani'yi nan: "Chioza' wli' wsedile' yog'lolte ben'." Na' yog' ben' chzenag che Xa'na' na' chajni'gakile' daa ne', legaken' chongake' nad' txen.

⁴⁶Aga ga zoa ben' ba ble'ile' Xa'na'; toz nad', ben' za' yabana', ba ble'idee. ⁴⁷Dii li nia' le', nottez ben' nonlilallee nad' de yel' mban che' zejli kani. ⁴⁸Nadaan nak' ka yel' wawa' daa choe'n yel' mban che ben' zejli kani. ⁴⁹Dii xozxto'leka' wdaogake' daa le maná latja' gana' bibi chashj chleb na' bia'kzə witgake'. ⁵⁰San nad' cho'a dill' che yel' wao daa za' yabana', na' beena' gawe'n aga bi yel' wit zejli kani ile'ile'. ⁵¹Nadaan nak' yel' wao daa za' yabana' daa cho'en yel' mban che ben'. Beena' gao yel' wawi, ibane' zejli kani. Na' yel' wawa' daa wi'ane', lennan' beli chen cha'ni daa chzanid' kwenche gat' yel' mban che ben' yell-lioni.

⁵²Na'ch ben' Israelka' wzolo chshesh chnegake', che' ljwelle':
—¿Nakra gon beeni gone' beli chen che'na' gaochon?

⁵³Na' che' Jesúsza' legake':

—Nad', Ben' Bse! Chioza' Yell-lioni, dii li nia' le', shi bi gaole kwerp cha'ni na' shi bi yeejle chen cha'ni, aga wat' yel' mban chele daa bi te cheyin. ⁵⁴La' ben'ka' gaogake' kwerp cha'ni na' yeejgake' chen cha'ni, ben'kan' gat' yel' mban chegake' zejli kani. Na' kat' illin lla te che yell-lioni, nad' yisbangakee ladj ben' wetka'. ⁵⁵La' kwerp cha'ni nakan dowalj yel' wao, na' chen cha'ni nakan dowalj dii cheeje'. ⁵⁶Beena' gao kwerp cha'ni na' yeeje' chen cha'ni, nake' nad' txen, na' lekzka' nad' nakee txen. ⁵⁷Xa'na', beena' bse! nad', zoe' zejli kani na' de yel' mban cha' daa mbane' le'. Na' ka'kzan beena' gao beli chen cha'ni ibane' daa wi'ane' yel' mbanna'. ⁵⁸Beli chen cha'ni nakan yel' waw dii za' yabana'. Ka nak yel' wawi, aga nakan ka daa le maná daa wdao dii xozxto'leka' na' bia'kzə witgake'. Beena' gao yel' wawa' daa za' yabana', ibane' zejli kani.

⁵⁹Diikin wna Jesúsza' shlak bli' bsedile' ben' gana' chdop chllag ben' Israelka' choe'lwillgake' Chioza' yell Capernaúma'.

Dill' dii nsa' yel' mban

60 Na' zan ben'ka' nogake'ne', ka bengakile' daa wna Jesúza', na' wnagake':

—Lallj inleeb nak dga chli' chsedi beeni. ¿Notgui gon ka ne'?

61 Na' Jesúza' gokbe'ile' bi wyazlall'gake' xtillee'na', na'ch wnabile' legake':

—¿Achakzbanile dga ba wnia' le'? 62 ¿Nakra gonle shel'ka' ile'ile nad', Ben' Bsel' Chioza' Yell-lioni, yiyep' gana' wzaa? 63 Espíritu che Chioza' cho'e yel' mban che ben', la' beli chenna' aga bi zakiin. Dill'ka' ba wnia' gonan ka soalen Espírituna' le' na' gat' yel' mban chele. 64 Per bia'kzə zoa bal-le bi chajle'le.

Goll Jesúza' legake' ka', la' dezd nechte ba nezczile' no ben'ka' bi chajle' che' na' non gon le' lo na' ben' malka'. 65 Na' chi'e legake':

—Ba wniakz' le' ni to kono gak gon nad' txen shi Xa'na' bi gone'ne' lall' na'.

66 Na' lo llana'tez ben' zan ben'ka' nakgake'ne' txen bkwasgake' bich janogake'ne'. 67 Na'ch che' Jesúza' ben'ka' shllin, ben'ka' nakgake'ne' txen:

—¿Alezkza' lenle cheenile yiyajle?

68 Na' Simón Pédrone' chi'ene':

—Xan', aga nochlə cheyi zakii wzenagnto', la' tozo' lin' choo dillaa daa chonan ka gat' yel' mban chento' zejli kani. 69 Ba wyajle'nto' cho', na' nezinto' lin' Crístona', Xiin Chios yaa Chios banna'.

70 Na' Jesúza' chi'e legake':

—Ba wlej' shllinle gakle nad' txen. Per tole nakle dii xiwaa txen.

71 Wne' ka' che Jud Scariota', xiin to ben' le Simón, la' nezile' nan Juda' gone'ne' lall' na' ben' malka', la'kzi wlene' ben'ka' shllin.

Ben'ka' nak ben' bish' golj Jesúza' bi wyajle'gake' che'

7 1 Ka wde dga, Jesúza' wde' doxen gana' mbani Galileana'. La' bi goklallee shaje' gana' mbani Judeana' daa cheeni ben' wnabia' che ben' Israelka' witgake'ne'. 2 Na' ka ba zoa gal'

lni che ranshdo'ka' daa chon ben' Israelka' yog' yiz, ³ben'ka' nak ben' bish' golj Jesúza' che'gake'ne':

—Bi yigaano' nizə, san wyaj Judeana' kwenche ben'ka' ba non li' txen ile'gakile' ye'l wakka' chono'. ⁴La' beena' cheeni seyi che', aga chkwashee diika' chone'. Bachgali chono' ye'l wakki, jentegan lao yog'loj ben'.

⁵La' ni ben' bisheekan' bi wyajle'gake' che'. ⁶Na'ch che' Jesúza' legake':

—Bin' illin lla illin gor gon' daa llia bia' gon'. San le', bat'tez wak shajle. ⁷Ben' yell-lioki bibi de dii gonan ka gakzbangakile' le', san nadaan chakzbangakile' daa chepgakee malan' chongake'. ⁸Li shaj le' lnina'. San nad' bi saa, la' bin' illin lla illin gor gak cha' daa llia bia'.

⁹Biyoll golle' legake' ka' na' bigaane' Galileana' zi xtit.

Wyaj Jesúza' lnina'

¹⁰Na' ka wde wza' ben' bisheeka', lekzka' wzee wyaje' lnina' do ngash'z. ¹¹Na' ben'ka' chnabia' ben' Israelka' chiyiljgake'ne' lo lnina', che' ljwellgake':

—¿Garanzi beena', lla?

¹²Na' ladj ben'ka' lle' lnina', ben' zan choe'gake' xtil' Jesúza'. Ba'le' che': “Nake' ben' wen.” Na' zi ba'le' che': “Bi nake' ben' wen, la' chdaze' chziyee ben'.”

¹³Per ni to kono biyaxji we' xtil' Jesúza' ka nla'z daa chllebgake' ben'ka' chnabia' ben' Israelka'.

¹⁴Na' ba zej shon tap lla chak lnina' ka bllin Jesúza' gana' zoa yoodo'na' na' wzoloe' chli' chsedile' ben'. ¹⁵Na' chibani ben' Israelka', na' che' ljwelle':

—¿Nakra chak chli' chsedi beeni ben', len aga bi nsede'?

¹⁶Na' che' Jesúza' legake':

—Diika' chli' chsedid' aga nakan dii chyiljlall'z', san beena' bsel' nad', len' bli' bsdile' nad' diiki. ¹⁷Nottez ben' cheenile' gone' ka cheeni Chioza', wakbe'ile' shi daa chli' chsedid' nakan che Chios wa shi nakan dii chyiljlall'z'. ¹⁸Beena' tobialo'ze' cho'e xtillee, balaan che kwinzen' chyilje', san beena' chyilje' sho' beena' bsel' le' balaan, len' cho'e dill' li, na' aga bi dill' wxiye' cho'e.

¹⁹Dii Moiséza' bene' le' ley che Chioza', na' ni tole bi chonle

ka nllian bia' gonle. ¿Biche cheenzile witle nad'?

20 Na'ch ben'ka' lle' na' che'gake'ne':

—Dii xiwaan yoo no' ka'. ¿Noran cheeni wit li'?

21 Na' che' Jesúza' legake':

—Tochga yel' waka' ba ble'ile ben' llana' chombaanchó na' yog'le chibanile. 22 Dii li dii Moiséza' bene' byen yog'tele nakle ben' byo chiyal' sho'le sen daa le circuncisión, la'kzi aga len' wzololene'n, san dii xozxto'leka'ten. Daan chgoole bi' byodo'ka' senna' la'kzi nakan lla chombaanchó. 23 Na' shi choe'le latj sho' bi' byodo'ka' sen daa le circuncisión lo llana' chombaanchó kwence'ch'e' kak ka na leya' daa bzej dii Moiséza', ¿biche chllaa'zle nad' daa biyon' to ben' llana' chombaanchó? 24 Bi wchoglizle che ben' shi bi chle'ile chone', san cheenin inezile nakyen'an nakan kwence'ch'e' we'le dill' kon ka nakan.

Jesúza' wne' zee gana' zoa Chioza'

25 Na'ch bal ben' Jerusalénka' nagake':

—¿Aaga beenin cheengakile' witgake', lla? 26 Li wwia ka cho'e dill' ladj lkwe' ben', na' ni to kono bi che'. ¿Anti ba chajle'lza ben' wñabia'ka' nan dii li beeni nake' Crístoná, beena' wsel' Chioza' inabi'e, lla? 27 Cho' nezicho ga ben' beeni. San kat' yid beena' nak Crístoná, ni to kono inezí galə za' beena'.

28 Jesúza' chli' chsedile' ben'ka' yoodo'na', na' ka benile' daa wna ben'ka' che', na' wnie' zillj chi'e':

—Chakzile nombia'le nad' na' nezile ga ben' nad'. Aga zaa tolazz', san zoa beena' bsel' nad', beena' chon kon ka chchebe' gone'. Na' le' bi nombia'lene', 29 san nad' nombi'ane', la' gana' zoen' wzaa, na' len' bselee nad'.

30 Na'ch bale' goklall'gake' gox'gake'ne', per ni toe' bi bex' le', la' bin' illin lla illin gor gak che' daa llia bia'. 31 Na' ben' zan wyajle'gake' che', na' wna'gake':

—Kat' yid beena' nak Crístoná, beena' wsel' Chioza' inabi'e, ¿awli'techle' yel' wak aga ka daa chli' beeni, lla?

Goklall'gake' gox'gake' Jesúza'

32 Na' fariseoka' bengakile' dillaa daa choe' ben'ka' che' Jesúza'. Na' legake' len' bxo'zka' chñabia' bsel'gake' ben'ka' chap yoodo'na'

kwenche lljex'gake' Jesúza'. 33 Na' Jesúza' golle':

—Aga sshach soalen' le', na'ch yiyaa gana' zoa beena' bsel' nad'. 34 Na' yiyiljle nad' per aga willelile nad' daa bi gak yidle gana' lljaoza'.

35 Na'ch ben' Israelka' che' ljwellgake':

—¿Garan yiyaj beeni na' bich yillelichone', lla? ¿Anti gana' lle' ben' wllall chechoka', ben'ka' lle' lall ben' zit'kan' shaje' kwenche lljasedile' ben' griegoka', lla? 36 ¿Beran zejin daa ne': “Yiyiljle nad', per aga willelile nad' daa bi gak yidle gana' lljaoza'”?

Espíritu che Chioza' nake' ka nis yaa nis ban

37 Na' llana' zeelo gok lnina', llana' nak lla choo lla xen, wzolla' Jesúza' na' wnie' zillj, chi'e:

—Shi nole chbili, li da yeejle nisa' daa gon' le'. 38 Na' gak kon ka na Cho'a Xtill' Chioza' gana' nan beena' gonlilallee nad', gak loo yichjlall'do'ena' ka ga chaltit nis yaa nis ban.

39 Na' daa wna Jesúza' ka', zejin soa Espíritu che Chioza' loo yichjlall'do' beena' gonlilall' le'. La' ka gora' bin' yidsoa Espírituna' loo yichjlall'do' ben' daa bin' sho' Jesúza' balaanna' daa llia bia' sho'e kat' yiyepe' gana' zoa Chioza'.

Gok ben'ka' chop shon kwenlə

40 Na' bal ben'ka' bengakile' daa wna Jesúza' na' wnagake':

—Dii li beeni nake' beena' llia bia' yid kwenche chixji'e daa che' Chioza'ne'.

41 Na' zi bale' che'gake':

—Beenikzan' Crístona', beena' chbezcho wsel' Chioza' inabi'e. Na' zi bale' che'gake':

—¿Achakile ladj ben' Galileaka' ichej beena' wsel' Chioza' inabi'e? 42 Cho'a xtill' Chioza' nan lo dia che dii Davina' galj beena' nak Crístona', na' gake' ben' yell Belén ka dii Davina'.

43 Ka' gok, gokgake' chop shon kwenlə ni che Jesúza'. 44 Bale' goklall'gake' gox'gake'ne', per ni toe' bi biyaxji.

Ben'ka' wnabia' ben' Israelka' bi wyajle'gake' che Jesúza'

45 Na'ch ben'ka' chap yoodo'na' billingake' gana' zoa fariseoka' len bxozka' chnabia'. Na'ch che'gake' legake':

—¿Biche bi bche'lene'?

46Na' ben'ka' chap yoodo'na' che'gake':

—Ni to konon' we' dill' ka dillaa choe' beena'.

47Na'ch che' fariseoka':

—¿Alezkka' lenle ba wxiyee? 48Ni to ben' wnabia' chechoka', ni neto' fariseo bi chajle'nto' che'. 49Per ben'ki bi nombia'gake' leya', ba wlliyai'gake'.

50Na' farisewa' le Nicodemo, beena' wyaj lao Jesúza' wal-lə, chi'e legake':

51—Ley chechona' nan aga wak wchoglocho che to ben' inacho chone' mal shi bin' wzenagcho dillaa wi'e kwenche inezicho bin chone'. ¿Anti aga kan' nakan?

52Na'ch che'gake'ne':

—¿Alezkka' ben' Galilea li'? Bsed kwenche inezilo' ni to ben' chyixjee daa che' Chioza'ne' bin' ichej gana' mbani Galileana'.

53Na'ch billeshgake' ziyaj lill che chegake'.

Noola' bidol'len ben' byona'

8 1Na' Jesúza' wyaje' lo Yaa Olívoza'. 2Na' betiyo ka wyeeni' wizaje' yoodo'na'. Na' ben' zan inleeb wbig' kwite'na', na' wchi'e wzoloe' bli' bsedile' legake'. 3Na'ch ben'ka' chli' chsedi leya' len fariseoka' nche'gake' to noolə bidol'lene' to ben' byo, na' bzegake'ne' ladj ben'ka' lle' na'. 4Na' che'gake' Jesúza':

—Maestro, ba bidolinto' nooli kon to ben' byo. 5Na' nezinto' leya' daa bzej dii Moiséza' nan chiyal' witcho noolka' chon ka' kon yaj. ¿Shera li', bi ka ino'?

6Che'gake'ne' ka' kwenchez kweygake'ne' dill' ga si' sengake' na' gaogake' xya che'. Na'ch Jesúza' bchekee bzeje' lo yona' kon xbene'na'. 7Na' daa zeyidgake' chnabgakile'ne', na' bibe'shawee chi'e legake':

—Beena' bibi saaxya che' de, wak soloe' wtakwe'ne' yaja'.

8Na'ch bizchekee chizzeje' lo yona'. 9Na' ka goll Jesúza' legake' ka', na' biza' twej tweje', wzolozan ben' golka' na'tech ben' xkwid'ka', na' stoz noola' bgaanlene' Jesúza'. 10Na' bibe'shao' Jesúza' dii yoblə, na' chi'ene':

—Noolə, ¿garan ben'ka' chao xya cho'? ¿Ani toe' bibi beni li'?

11 Na' che' noola'ne':

—Ni toe', ben'do'.

Na'ch che' Jesúza'ne':

—Ni nad' bibi gonid' li'. Biyaj, na' bich wxinj wleno'.

Jesúza' nsee beeni' che ben' yell-lioni

12 Na'ch Jesúza' bizoloe' choe'lene' ben'ka' lle' na' dill', chi'e:

—Nad' nak' beeni' che ben' yell-lioni. Beena' gone' nad' txen bich soe' lo yel choj che dii mala', san loo yichjall'do'ena' gape' beeni' daa nsa' yej' mban zejli kani.

13 Na'ch che' fariseoka'ne':

—Li' choe'zo' xtill' kwino', na' daa choe' xtill' kwino' bi nakan dii shajle'cho.

14 Na' che' Jesúza' legake':

—La'kzi choa' dill' che kwino', nezid' nakan dill' li, la' nezid' gan zaa na' gan yiyaa. San le', aga nezile gan zaa, ni bi nezile gan yiyaa. 15 Le' chchoglole che ben' lega ben' yell-lion. San nad' bi chchogloa' che ben'. 16 Per shi nad' wchogloa' che ben', kon ka nakannan' wchogloa'n, la' aga tobia'lozaan chchogloa'n, san Xa'na', beena' bsel' nad', naknto' txen chchoglonto' che ben'. 17 Ley chelena' nan shi chop ben' toz ka chitili xtilleeka' chiyal' shajle'cho chegake'. 18 Na' nak chopnto', nad' cho'a dill' che kwino', na' lekzka' Xa'na', beena' bsel' nad', cho'e dill' cha'.

19 Na'ch che'gake'ne':

—¿Garan zoa Xo'na'?

Na' che' Jesúza' legake':

—Ni nad' ni Xa'na' bi nombia'le. La' shel' nombia'le nad', lekzka' nombia'le Xa'na', shel'ka'.

20 Jesúza' bi'e dill'ki shlak bli' bsedile' ben' latja' gana' chi' daa chgoogake' mech che yoodo'na', per ni to kono bex' le' daa bin' illin lla bin' illin gor gak che' daa lla bia'.

Jesúza' wne' kono gak yiyaj gana' yiyaje'

21 Na'ch Jesúza' wizi'e legake':

—Nad' yiyaa, na' yiyilje nad', na' gana' yiyaa aga wak sa'le, la' lao saaxya cheleka' guetle.

22 Na'ch ben' wnabia' che ben' Israelka' che' ljwellgake':

—¿Acheenile' yiyit kwinen!, lla? ¿Adaan naze!: “Gana' yiyaa bi gak sa'le”?

23Na'ch che' Jesúza' legake':

—Le' nakle ben' yell-lío, na' nad' zaa yabana'. Le' chonle lega ben' yell-lío, san nad' bi chon' ka le' ben' yell-lío. 24Daan nia' le', guetle lao saaxya cheleka'. La' shi bi chajle'le nadaan nak' beena' ba wnia' nak', na' guetle lao saaxya cheleka'.

25Na'ch che'gake'ne':

—¿Norakzə li', shka'?

Na' che' Jesúza' legake':

—Nadaan nak' beena' ba wniakz' le' dii nechte. 26Dii zan dii gak inia' dii gaogakan xya chele. Per beena' bsel' nad' cho'e dill' li, na' daa wne' nad' lennan' choe'len' ben' yell-lioni dill'.

27Na' legake' aga wyajni'gakile' shi xtill' Xe'nan' choe'lene' legake'. 28Na' daan chi'e legake':

—Kat' ba bda'le nad', Ben' Bsel' Chioza' Yell-lioni, to lee yag, kana'chan gakbe'ile nak' beena' ba wnia' nak'. Na' gakbe'ile aga ga de to dii ben' to bia'loz', san kon daa bsemi Xa'na' nad', lennan' cho'a dill'. 29La' Xa'na', beena' bsel' nad', lekzen' zoalene' nad'. Bi chbey yichje' nad', la' toshiizi chon' ka chazlallee.

30Na' ka biyoll be' Jesúza' dill'ka', ben' zan ben'lilall'gake'ne'.

Ben'ka' chnabia' dii mala' yichjlall'do'eka'

31Na'ch che' Jesúza' ben' Israelka' ba chajle' che':

—Shi le' soachechle gonle ka ba wnia', dii li txenan ba nakle nad', shi naa. 32Na' gombia'le dill' li cha'na', na' kat' ba nombia'len, gakle ka to ben' ba biyell bila' lao daa ntakw nchejan le'.

33Na'ch che'gake'ne':

—Neto' naknto' xiin dia che dii Abrahama' na' axt naanlla aga non' inabia' neto' kwenche gonznto' kon daa ine'. ¿Berache nazo' yiyell yila'nto'?

34Na' che' Jesúza' legake':

—Dii li nia' le', nottez beena' chon dii mala' nake' ka ben' ndoo lawinna' daa chnabi'an le'. 35To wen llin aga toshiizi soe' lill' xane'na', san xiin xan llinna', toshiizi soe' lill' xe'na'. 36Na' shi nad', Xiin Chios, yisell yilaa le' lawi dii mala', dii li wiyell wila'le lawinna'. 37Nezkzid' nakle xiin dia che dii Abrahama',

per cheenile witle nad' daa bi chleble cho'a xtilaani. ³⁸Nad' cho'a dill' che daa ba ble'id' gana' zoa Xa'na', na' le', chonle ka na xalena'.

³⁹Na' che'gake'ne':

—Xiin dia che dii Abrahama' neto'.

Na' Jesúza' chi'e legake':

—She'l' nakle dowalj xiin dia che dii Abrahama', kon ka ben dii Abrahama' chonle, shel'ka'. ⁴⁰La'kzi ba wnia' le' dill' li daa wna Chioza' nad', kon cheenkzile witle nad'. Dii Abrahama' agaga bene' ka chonle. ⁴¹Le' chonle kon ka chon xalena'.

Na'ch che'gake'ne':

—Aga naknto' ka to ben' bi wyoo xayin. Toz Chioza' nake' Xanto'.

⁴²Na'ch che' Jesúza' legake':

—She'l' lekzile Chioza' nake' Xale, wakile nad' shel'ka', la' kwite'nan' wzaa. Aga tobialozaan bid', san Chiozan' bselee nad'. ⁴³Na' aga chajniile diika' nia' le' daa bi cheenile wzenagle dill'ka' cho'a. ⁴⁴Dii xiwaan nak xale na' chibaile chonle daa chaklalliin. La' kana'te dii xiwaa nakan to wen xya, na' ni shlin bin' gonan daa nak shli, ni bi choe'n dill' li. Kat' chziye'n chonan kon ka nan loo lall'do'inna', la' nakan liizelozi dii wxiye' na' nakten xan ye'l' wxiye'na'. ⁴⁵Na' nad', daa cho'a dill' lina' aga chajle'le cha'. ⁴⁶Ni tole bi gak wli'le shi de saaxya cha'. Na' shi cho'a dill' li, ¿berache bi chajle'le cha'? ⁴⁷Beena' nak xiin Chioza' chzenague' stilleena'. Na' le', bi chzenaglen daa bi nakle xiine'.

Ba zoakz Crístona' kana' zi' galj dii Abrahama'

⁴⁸Na'ch ben' wnabia' che ben' Israelka' che'gake'ne':

—¡Aga naznto' nanto' nako' ben' Samaria na' yootio' to dii xiw'!

⁴⁹Na' che' Jesúza' legake':

—Aga no dii xiw' yo'a, san Xa'nan' chgwaa balaan, per le', chnit chdele nad'. ⁵⁰Aga chyilj' koo ben' nad' balaan. San zoa beena' cheeni sho'a balaan, na' len' chchogloe' che ben' kon ka nakan. ⁵¹Dii li nia' le', beena' chon ka nia', ibane' zejli kaní.

⁵²Na'ch ben' wnabia' che ben' Israelka' che'gake'ne':

—Naach ba wnezinto' dii xiw'kzan yoo. Dii xozxto'cho Abrahama' wite' na' lekzka' yog' ben'ka' wdixjee daa goll Chioza'

legake' kani'yi. Na' li' naa, nazo': "Beena' chzenag cha' ibane' zejli kani'." 53 ¿Achakilo' zak'cho' aga ka dii xozxto'cho Abrahamama'? Le' wite' na' ka'kzə dii ben'ka' wdixjee daa goll Chioza' legake' kani'yi. ¿Noraka chakzi kwino'?

54 Na'ch che' Jesúza' legake':

—She'l' nadaan chgwaa kwina' balaan' aga bi zakiin, shel'ka'. Per Xa'na', beena' nale nake' Chios chele, len' chgwee nad' balaan'. 55 La'kzi bi nombia'lene', nad' nombi'ane'. Shel'ka' nia' bi nombi'ane', na' nak' ka le' ben' wxiye'. Per nombi'ane' na' chon' ka ne'. 56 Dii xozxto'cho Abrahamama' bibaile' daa wnezile' ile'ile' llaki zoa' yell-lioni. Na' ba ble'ile'n na' bibaile'.

57 Na'ch ben'ka' chnabia' ben' Israelka' che'gake'ne':

—Ni shiyon yiz bin' gakilo' na' nazo' zle'ilo' dii Abrahamama'.

58 Na'ch che' Jesúza' legake':

—Dii li nia' le', kana' zi' galjte dii Abrahamama', bakz zoa' nad'.

59 Na'ch lii wdoyotegake' yaja' nan wtakwgake'ne'n, per lii bkwash'tie' na' bizee gana' zoa' yoodo'na'. Na' ni bi gokbe'gakile' bidie' ladje'ka' ziyaje'.

Biyon Jesúza' to ben' lchol

9 1 Ka zej Jesúza' na' ble'ile' to ben' byo ben' golje' nchole'. 2 Na' ben'ka' nakgake'ne' txen che'gake'ne':

—Maestro, ¿berache golj beeni nchole', lla? ¿Anchole' ni che saaxya che'na', anti ni che saaxya che xaxneekan', lla?

3 Na' che' Jesúza' legake':

—Aga ni che saaxya che'nan' ni aga ni che saaxya che xaxneekan', san kwenche wli'lawi ye'l' wak che Chioza' lo ye'l' mban che'nan' nake' ka'. 4 Shlak naa ni de latj, chiyal' goncho xshin beena' bsel' nad'. La' wllin lla kat' kochno bi gak gon. 5 Shlak ni zoa' yell-lioni nak' beeni' che ben' yell-lioni.

6 Na' ka biyoll wna Jesúza' ka', na'ch blle' xeneena' lo yona' na' bene' lat' benj kon xeneena', na'ch wdebe'n jalao ben' lchola'.

7 Na' chi'ene':

—Wyaj jadib jalawo'na' cho'a tanga' daa le Siloé —na' Siloé zej in Ben' Nselee.

Na'ch wyaj ben' lchola' jadib jalawe'na', na' ka bizee na', ba chle'ile'. 8 Na'ch ben' wlill che'ka' na' ben'ka' ble'gakile'ne' kana'

n̄hole' che'gake':

—¿Aaga beenin chbi'e ch̄nabe' mecha'?

9Na' bāle' che':

—Awe, len'.

Na' zi bāle' che':

—Aga len', per ka'tekzə nake'.

Na' beena' chi'e:

—Nad'kzan'.

10Na'ch w̄nabgakile'ne':

—¿Nakra gok ba chle'ilo'?

11Na' chi'e legake':

—To bēn' le Jesús bene' bēnja' na' wdebe'n jalaw'ki na'ch wne' nad': “Wyaj gana' lliá tanga' daa le Siloé na' jadib jalawo'na'.” Na'ch wyaa na' ka biyiba'n, na' gok ble'id'.

12Na'ch che'gake'ne':

—¿Garan beena' no' ka'?

Na' chi'e legake':

—Bi nēzid'.

W̄nabyolli fariseoka' nak gok ble'i bēn' l̄chōla'

13Na'ch jwa'gake' beena' gok bēn' l̄chōl lao fariseoka'. 14Na' llana' wdeb Jesúza' bēnja' jalao beena' kwenche ble'ile' nakan lla chombaangake'. 15Na'ch fariseoka' lekzka' w̄nabgakile'ne' nak gok chle'ile'. Na' chi'e legake':

—Beena' biyone' nad' wdebe' bēnja' jalaw'ki, na' ka biyiba'n gok ble'id'.

16Na'ch bāl fariseoka' che'gake':

—Aga Chiozan' bselee beena', la' chone' daa bi chiya'l' goncho llani chombaancho.

Na' zi bāle' che'gake':

—¿Nakra gon to bēn' saaxya gone' ye'l' wak ka diiki chon beeni?

Na'ch gokgake' ch̄oplə. 17Na'ch dii yoblə gollgake' beena' gok bēn' l̄chol:

—¿Shera li'? ¿Bi ino' che beena' ben ka chle'ilo'?

Na' chi'e legake':

—Nad' nia' nake' to bēn' chyixjee daa che' Chioza'ne'.

18Na' ben'ka' chñabia' ben' Israelka' bi wyajle'gake' shi dii li gok beena' ben' lchol na' naa ba chle'ile'. Na'ch goxgake' xaxneena', 19na' wñabgakile' legake':

—¿Abeenin xiñlena', beena' nale nchole' ka golje'? Na' ¿nakra gok ba chle'ile' naa, shka'?

20Na' xaxneena' billiigake' xtilleeka':

—Ñezinto' beenin xiñnto'na' na' golje' nchole'. 21Per aga ñezinto' nak gok chle'ile' naa, ni bi ñezinto' non biyon le'. Li inabile', la' aga nake' bi'do' inacho bi gak ine' non biyon le'.

22Goll xaxneena' ka' daa chllébgake' ben'ka' chñabia' ben' Israelka', la' ba bgaangake' dill' nottezə ben' ine' Jesúza' nake' Crístona' bi wlebgake'ne' gana' chdop chllaggake' choe'lwillgake' Chioza'. 23Daan golltezə xaxneena': “Li inabile', la' aga nake' bi'do' inacho bi gak ine' non biyon le'.”

24Na'ch dii yoblə goxgake' beena' gok ben' lchol, che'gake'ne':

—Bzoashki Chioza' de taschiw shi leilo' choo dill' li, la' ñezinto' beena' biyon li' nake' ben' saaxya.

25Na'ch golle' legake':

—Bi ñezid' shi nak beena' ben' saaxya. Lete dii ñezid', golj' nchol na' naa ba chle'id'.

26Na'ch che'gake'ne':

—¿Beran benile' li'? ¿Nak bene' kwenche chle'ilo'?

27Na' chi'e legake':

—Ba wniakz' le', na' bi chzi'le cho'a xtilaana'. ¿Biche cheenzile inia'n dii yoblə? ¿Anti lekzka' lenle ba cheenile gonlene' txen?

28Na'ch wñegake'ne' zibia', che'gake'ne':

—Lin' nako' beena' txen, san neto' Moisézan' naknto' txen. 29Ñezinto' Chioza' wñie' Moiséza', san beena', ni bi ñezinto' ga zee.

30Na'ch beena' gok ben' lchol chi'e legake':

—¿Nakkzan dii yibanicho daa bi ñezile ga za' beena' na' ba bene' ka chle'id'! 31Ñezkzicho aga chzenag Chioza' che ben' saaxyaka', san chzenague' che ben'ka' choe'la'ogake'ne' na' chongake' daa chazlallee. 32Dezd ka wxw wzil yell-lioni bin' yenicho shi zoa ben' chak chone' ka chle'i to ben' golje' nchole'. 33Shel' beeni bi nake' to ben' bsel' Chioza', ni to yel' wak bi gak gone', shel'ka'.

34Na'ch che'gake'ne':

—Dezd ka goljo' nako' beṇ' saaxya. ¿Ana' chakilo' wli' wsedilo' neto'?

Na'ch bibejgake'ne' ladje'ka'.

Beṇ'ka' nḥol̄ nṇiti yichjlall'do'eka'

35 Na' wṇezi Jesúza' bibej fariseoka' beena' gok beṇ' lḥol̄ ladje'ka', na' ka billague'ne' na'ch chi'ene':

—¿Achon̄lilalloo Beena' Bsel' Chioza' Yell-lioni?

36 Na' beena' chi'ene':

—Beṇ'do', wnashki nad' nora beena' kwenḥe gon̄lilallaane'.

37 Na' che' Jesúza'ne':

—Ba ble'kzilo'ne', na' lekzen' chshaljleno' naa.

38 Na'ch lii bḥek'te xibe'na' lao Jesúza', na' chi'ene':

—Chon̄lilallaa li', Xan' —na'ch be'laweene'.

39 Na'ch che' Jesúza':

—Ba bid' yell-lioni kwenḥe wḥogloa' ḥe beṇ' yell-lioni. Zaa kwenḥe beṇ'ka' nak ka beṇ' lḥol̄ ile'gakile', na' beṇ'ka' chakgakile' chle'gakile' yiyakgake' ka beṇ' lḥol̄.

40 Na'ch baḷ fariseoka' lle' na', ka bengakile' chi'e ka', che'gake'ne':

—¿Achakilo' lennton' naknto' beṇ' lḥol̄?


41 Na'ch che' Jesúza' ḷegake':

—Shel' nakle beṇ' lḥol̄, aga bi xtol'le de, shel'ka'. Per daa nale chle'ile, daan de xtol'le.

Jempl̄ ḥe leej ḥe xil'ka'

10 ¹ Dii li nia' le', beena' bi choo cho'a leej ḥe xil'ka' san chiyiljlallee cho'e gan yoblə, beenan' beṇ' wbanna. ² San beena' choo cho'a leeja', len' ngoo lall' nee chape' ḷegakb. ³ Na' beena' chap cho'a leej ḥebka' chsalje'n kwenḥe cho'e, na' xil'ka' lii chiyombia'tegakb shi'ena'. Na' cho'e le to tob na' chbeje' ḷegakb loo leej ḥebka'. ⁴ Na' chde chbeje' yog' xil' ḥe'na' na'ch chbialoe' laobka'. Na' xil'ka' xochi chjanogakb le' daa nombia'gakb shi'ena'. ⁵ Aga willjanogakb beṇ' yoblə, san wxon̄jdogakib le' daa bi nombia'gakb shi'ena'.

⁶ Bzoa Jesúza' jempli kwenḥe bzajniile' beṇ'ka'. Per ḷegake' aga wyajni'gakile' bin zeji daa golle' ḷegake'.



Nad' nak' ka cho'a leej che xil'ka', na' beena' gonlilallee nad' bi kwiayee, san gake' ka xilaa, bana' mbalaz choob na' chchejb cho'a leej cheba' na' chllelib dii cheej chaob.

Jesúza' chapshi'e cho' ka ben' chapshi'e xil' che'

7Na'ch chize' Jesúza' legake':

—Dii li nia' le': Nad' nak' ka cho'a leej che xil'ka'. **8**Yog' ben'ka' bid kana' bin' yid', nakgake' ka ben' wban. Na' ben'ka' nia' nakgake' xil' cha' bi bzenaggake' chegake'. **9**Nad' nak' ka cho'a leej che xil'ka', na' beena' gonlilallee nad' bi kwiayee, san gake' ka xilaa, bana' mbalaz choob na' chchejb cho'a leej cheba' na' chllelib dii cheej chaob.

10'Ka nak wbanna', za'ze' kwenche kwane' na' wite' na' wlliyee legake'. San nad', zaa kwenche wi'a to yel' mban shao' chegake', na' soagake' mbalaz. **11**Nad' nak' ka to ben' chapshi'e xil' che'na', beena' axt chzani yel' mban che'na' ni che xil'do'ka' nape'. **12**San beena' chap xil'ka' ni che mba laxje'na', ka chle'ile' ba za' to ba znia gaob xil'ka', lii chchoonlall'tie'gakb na' chxonje' daa bi nakgakb ba che'. Na'ch chllin ba zniana' chox'b xil'ka' na' chsheshlesb legakb. **13**Beena' chzi' laxje'na' chxonjtezile' xil'ka', la' daa ikaaz laxje'nan' chibaile', na' bi chakile' legakb.

14'Nad' nak' ka to ben' chapshi' xil'do'. Na' ben'ka' chonlilall'gake' nad' nakgake' ka xil'do' cha'. Nad' nombi'a legake' na' legake' lekzka' nombia'gake' nad'. **15**Ka chak che Xa'na' nombi'e nad', na' nad' nombi'ane', ka'kzan nad' nombi'a

legake', na' chzanid' yel' mban cha'ni ni chegake'. 16Na' lezkza' zoach ben' yoblə, ben' zi' gonlilall' nad', na' lezkza' nakgake' ka xil' cha', per bin' gaggake' txen xil' cha'ka'. Na' chiya' gaxgakee kwenche wzenaggake' cha', na' yog'gake' gaggake' tozə, na' toz nad' gak lall' na'gake'.

17'Chaki Xa'na' nad' daa chzanid' yel' mban cha'ni witgake' nad', na'tech yiban' sto shii. 18Ni to kono yikaa yel' mban cha'ni, san kwinkza'n wi'an. Nap' yel' wñabia' kwenche wi'a yel' mban cha'ni witgake' nad', na' lezkza' nap' yel' wñabia' kwenche yiban'. La' kan' nllia Xa'na' bia' gon'.

19Na'ch dii yoblə ben' Israelka' lle' na' gokgake' choplə ka bengakile' daa wne'. 20Zane' che'gake':

—¿Biche chzenagzle che beena'? Dii xiwaan yo'e, na' chaktonte'n.

21Na' zi bale' che'gake':

—Aga choe' beeni dill' ka ben' yoo dii xiw', la' aga bi yel' wak nap dii xiwaa yiyonan to ben' lchol.

Ben'ka' chñabia' ben' Israelka' bi bzenaggake' che Jesúza'

22Na' do kana', gol' lnina' Jerusalénna' daa chisa'lall'gake' llana' bengake' lall' na' Chioza' yoodo'na', na' nak beo' zag. 23Na' chda Jesúza' loo koridor che dii Salomónna' daa ze kwit yoodo'na'. 24Na' ben'ka' chñabia' ben' Israelka' wyechjyobgake'ne', che'gake'ne':

—¿Axt batrakzə yikwaso' yel' chakchoplall' chento'ni? Shi li'kzan Crístona', beena' chbeznto' wsel' Chioza', lla wnatega neto' kwenche inezinto'.

25Na' che' Jesúza' legake':

—Ba wniakz' le' kan', na' bi chajle'le. Yel' wakka' chon', chonlena'n yel' wñabia' che Xa'na', na' chli'n nan len' bselee nad'. 26Na' le', bi chajle'le daa bi nakle txen ben'ka' nia' nakgake' xil' cha'. 27Nombi'a ben'ka' nia' nakgake' xil' cha', na' legake' chzenaggake' xtillaana' na' nogake' nad'. 28Na' cho'a legake' yel' mban zejli kan'i, na' bi kwiayi'gake'. Na' ni to kono gak yibej legake' lo ni'a na'ni. 29Xa'na' ba bene' legake' lall' na' gapshii'gakee, na' len' chñabia'che' lao nottez. Na' ni to kono gak yikwas legake' lo ni'a neena'. 30Ka Xa'na'kz, nad'.

31 Na'ch ben' Israelka' bizgoyogake' yaja' kwenche nan wtakwgake'n Jesúza'. 32 Na' chi'e legake':

—Dii zan dii wen ba ble'ile chonlen' yel' wak che Xa'na'. Na' ¿nonnan' bi choolall'le daa cheenile' wtakwle nad' yaja'?

33 Na' ben'ka' chñabia' ben' Israelka' che'gake'ne':

—Aga ni che dii wenka' ba benon' cheeninto' wtakwnto' li' yaja', san daa chonz kwino' ka Chiozan', la' ben'zə li'.

34 Na'ch che' Jesúza' legake':

—Ley chelena' nan, Chioza' ne': “Nad' wnia' le' nakle chios.”

35 Cho'a Xtill' Chioza' toshiizi nakan ka wne', na' shi cho'en dill' bsi'e “chios” ben'ka' wdixjee xtilleena', 36 ¿biche nazle nad' chñia' che Xacho Chioza' daa nia' nak' Xiine', len len' wleje' nad' na' bselee nad' yell-lioni? 37 Shi bi chon' ka chon Xa'na', aga wyajle'le cha'. 38 Na' shi chle'ile chon' ka diika' chon Xa'na', li shajle' che diika' chon', la'kzi bi cheenile shajle'le cha', kwenche inezyen'ile Xa'na' zoalene' nad' na' nad' zoalenee.

39 Na'ch dii yoblə goklall'gake' gox'gake'ne' na' bene' gan bile' lawe'ka'.

40 Na'ch bizyaj Jesúza' dii yoblə shlaa yao Jordánna' jazoe' latja' gana' bchoa Juanna' ben'ka' nisa' kana'. 41 Na' ben' zan wyajgake' gana' zoe' na' che'gake':

—La'kzi bibi yel' wak bli' Juanna', yog' diika' wne' che beeni nakan dii li.

42 Na' ben' zan wyajle'gake' che Jesúza' na'.

Wit Lázaroná'

11 1 Yell Betániana' wzoa to ben' bi shao' wlie' Lázaro, na' lekzka' na' wzoa ben' zane'ka' Maríana' len Mártana'. 2 Maríana', ben' zan Lázaroná', len' bwazje' set zixa' ni'a Xancho Jesúza' na' bisbillile'n yish' yichje'na'. 3 Na' chop bilte ben' zan Lázaroná' bsel'gake' rson lao Jesúza' che'gake'ne':

—Xan', bi shao' ben' zannto'ni, beeni nllaguilo'.

4 Na' ka beni Jesúza' rsonna', chi'e:

—Bi guetile' yillwe'na', san chak che ka' kwenche sho' Chioza' balaan, na' lekzka' nad', nak' Xiine', sho'a balaan.

5 La'kzi Jesúza' chakchgaile' Mártana', na' ben' bile'na' na' Lázaroná', 6 ka benile' rson bi shao' Lázaroná', wllachile' zi chop

lla gana' zoe'. ⁷Na' ka wde, chi'e beṅ'ka' nakgake'ne' txen:

—Li sho' Judeana' sto shii.

⁸Na'ch beṅ'ka' nakgake'ne' txen che'gake'ne':

—Maestro, kani batchgana' goklallii beṅ' Israelka' lle' na' witgake' li' kon yaja'. ¿Ana' cheenilo' yizajo' na'?

⁹Na' che' Jesúza' legake':

—¿Aaga shllin goran' de beeni'na' shlla? Na' beena' chda tellalə aga willjəchewee daa de beeni'na' yell-lioni. ¹⁰San shi chde' wal-lə, willjəchewee daa bi nla'.

¹¹Na'tech golle' legake':

—Ba ches Lázaroná', beena' nllaguicho, na' sha' lljasbanee.

¹²Na'ch che' beṅ'ka' nakgake'ne' txen:

—Xan', shi ba chese', wiyakshao'lall'kzile'.

¹³Jesúza' golle' ka' daa nezile' ba wit Lázaroná', na' legake' chakgakile' daa cheszen' golle' ka'. ¹⁴Na'ch be'len Jesúza' legake' dill' ka to shajni'gakile', chi'e:

—Ba wit Lázaroná'. ¹⁵Na' chibaid' bi wzoa', la' chyalljch gon' ka shajle'chle cha'. Li sho' shajcho gana' die'.

¹⁶Na'ch Tomáza', beena' che'gake' Dídimob, chi'e beṅ'ka' sto:

—Li sho'lene' kwenche lencho guetlenchone' shi witgake'ne'.

Jesúza' chak yisbane' beṅ' wetka'

¹⁷Na' ka bllingake' yella', na' che'gake'ne' ba gok tap lla bgash' Lázaroná'. ¹⁸Na' Betániana' llian gaozə Jerusalénna', ka do shon kilómetro nlaagakan. ¹⁹Na' beṅ' zan beṅ' Israelka' lle' Jerusalénna' wyajgake' jenxenall'gake' Mártana' len Maríana' daa wit beṅ' zane'ka'. ²⁰Na' ka wnezi Mártana' ba zoa illin Jesúza', na'ch jatile'ne', per Maríana' bigaane' lille'ka'. ²¹Na' ka blline' kwite'na', chi'ene':

—Xan', shel' zo' ni kana' wlen yillwe' che beṅ' zan'na' bi wite', shel'ka'. ²²Na' naa la'kzi ba wite', nezid' gon Chioza' bittezə dii inabilo'ne'.

²³Na' che' Jesúza'ne':

—Wiban beṅ' zano'na'.

²⁴Na'ch che' Mártana':

b 11:16 *Dídimo*: zejín bi' kwesh.

—Awe, nezid' wibane' kat' yiban ben' wetka' llana' te che yell-lioni.

25Na' che' Jesúza'ne':

—Nad' chon' ka chiban ben' wetka' na' nap' yel' mban dii bi te cheyin. Beena' chonlilallee nad', la'kzi ba wite', wibanckkze'.

26Na' yog' ben'ka' mban na' chonlilall'gake' nad' bi guetgake' toshiizi. ¿Achajli'o dga nia' li'?

27Na' che' Mártana'ne':

—Awe, Xan', chajli'a lin' nako' Crístona', na' lin' Xiin Chioza', beena' llia bia' yid yell-lioni.

Wchell Jesúza' gana' bkwash'gake' Lázarona'

28Na' biyoll wna Mártana' ka', na'ch ziyaje' zjanie' ben' bile' Maríana', na' chi'ene' xochizi:

—Ba bid Maestrona' chnie' li'.

29Na' kon ka golle' Maríana' ka', lii wzolla'tie' jawie' Jesúza'. 30Bilan' sho' Jesúza' yella', ni zetie' gana' jatił Mártana'ne'. 31Na' ben' Israelka', ben'ka' chonxenlall'gake' Maríana' lille'na', ka ble'gakile' wzollee na' zejdoe', na'ch zjanogake'ne' chakgakile' lljchelle' cho'a banan'.

32Na' ka bllin Maríana' kwit Jesúza', lii bchek'te xibe'na' lawe'na' chi'ene':

—Xan', shel' zoasho' ni, bi wit ben' zan'na', shel'ka'.

33Na' ka ble'i Jesúza' chbell Maríana', na' ka'kzə ben'ka' zejlengake'ne', na' to dii wal inleeb gokile'. 34Na' chi'e legake':

—¿Gara jakwash'lene'?

Na'ch che'gake'ne':

—Sho' lljawiacho gana' die', Xan'.

35Na' wchell Jesúza'. 36Na'ch che' lljwell ben' Israelka' lle' na':

—Li wwia ka gokchgaile'ne'.

37Na'ch bałe' che'gake':

—Beeni bene' ka ble'i ben' lchola', ¿Aaga zak bisle' Lázarona', na' bi wite' shel'ka', lla?

Bisban Jesúza' Lázarona' ladj ben' wetka'

38Na'ch Jesúza' wizakile' dii wal ka bllingake' cho'a bana'. Na' bana' nakan to blej, na' chi' to yaj nkwasha'n cho'ayinna'.

39Na'ch che' Jesúza':

—Li yikwas yaja' ka'lə.

Na' Mártana', beṅ' zan beṅ' weta', chi'ene':

—Xan', ba chḷa' beena' zban, la' ba gok tap lla wite'.

40Na' che' Jesúza'ne':

—¿Aaga ba wnia' li' shi shajli'o, na' ile'ilo' yeḷ' wak choo yeḷ' wak xen che Chioza'?

41Na'ch bikwasgake' yaja' cho'a bana' gana' die'. Na' blis jalao Jesúza' yabana', na' chi'e:

—Xa, choxkeno' ba bzenago' cha'. 42Nezid' toshiizi chzenago' cha', per chnia' li' kwenche shajle' beṅ'ki lle' ni nan lin' bseloo nad'.

43Na' ka biyoll wne' ka', na'ch wnie' zillj, chi'e:

—¡Lázaro, bichej na'!

44Na' lii bichejte Lázaroná' ndob ni'a neena' lech'ka', na' cho'alawe'na' ndoban to lech'. Na'ch che' Jesúza' legake':

—Li yizeshe' lechaa na' li yisane' yiyaje'.

Wloogake' xnezin gox'gake' Jesúza'

(Mt 26:1-5; Mr. 14:1-2; Lc 22:1-2)

45Na' zan beṅ' Israelka', beṅ'ka' jen Maríana' txen daa wit beṅ' zane'na', ble'gakile' ka ben Jesúza' na' benlilall'gake'ne'.

46Per bale' wyaj lao fariseoka' na' jellgake' legake' ka ben Jesúza'.

47Na'ch bxoška' chṅabia' na' fariseoka' bitopgake' yog' beṅ'ka' chṅabia' beṅ' Israelka', na' che'gake':

—¿Nakraz ka gonchon, lla? La' zan yeḷ' wak chli' beeni. 48Na' shi inacho jwayi beena', yog'z beṅ' gonlilall'gake'ne' na'ch yid beṅ' Rómaka' na' wlliyi'gake' yoodo' chechoni len yell chechoni.

49Na' len to beṅ' le' Caifás, nake' bxož choo bxož xen ka lo yiza'. Na' chi'e legake':

—Bi nezzilen, 50ni bi chakbe'ile wenlan toz beṅ' guet ni che beṅ' wlall chechoka', aga ka daa kwiayi' doxen lallchoni.

51Na' aga kon ka wnaz Caifáza' kan', san daa nake' bxož choo bxož xen lo yizan', ben Chioza' ka bi'e dill' guet Jesúza' ni che beṅ' Israelka'. 52Na' aga ni che toz beṅ' Israelkan' guet Jesúza', san lekzka' ni che yog' beṅ'ka' ba wleje' gaxgake' xiine' doxen yell-lionin, kwenche gaxgake' toz. 53Na' daa goll Caifáza' ka', lo llana' wzolo bengake' toz dill' kwenche witgake' Jesúza'.

54Na' daa wzolo chongake' ka', aga wdatekch Jesúza' ladj ben' Israelka', san wzee wyaje' to yell dii le Efraín, daa llia gaozə latja' gana' bibi chashj chleb, na' na'z wzoe' len ben'ka' nakgake'ne' txen.

55Na' ba zoa gao gal' Iní Paskw che ben' Israelka', na' ben' zan ben' yell yoblə wyajgake' Jerusalénna' ka zi' gal' Inina' kwenche yixi yiyechgake' ka nllia leya' bia'. 56Na' chdagake' chiyiljgake' Jesúza', na' shlak lle'gake' lesh' chyoodo'na', chnabi ljwelle':

—¿Beraka chakile? ¿Awide' Inina', lla?

57Na' b̄xozka' ch̄nabia' len fariseoka' bengake' mandad shi no nezi ga chda Jesúza' do na' lljellgake' legake' ka' kwenche gox'gake'ne'.

Bwazj Maríana' set zix̄a' n̄i'a Jesúza'

(Mt 26:6-13; Mr. 14:3-9)

12 1Zi' xop lla gal' Iní Paskwa' wyaj Jesúza' yell Betániana', gana' zoa Lázaroná', beena' bisbane' ladj ben' wetka'. 2Na' ben'ka' lle' Betániana' bsini'agake' to xshe' che Jesúza', na' Mártana' bdie' yel' wawa'. Na' Lázaroná' wche'lene' Jesúza' cho'a mesa' na' nochlə ben'ka' wdaolengake'ne'. 3Na'ch bex̄' Maríana' ka do gashj litr set zix̄a' daa le nardo, daa le zak'chga, na' bwazje'n n̄i'a Jesúza', na' tech bisbillile'n yish' yichje'na'. Na' doxen loo yooná' wche' shii set zix̄a'. 4Na' len Jud Scariota', beena' nak Jesúza' txen, beena' gone'ne' lo na' ben' malka'. Na' golle':

5—¿Berache bi betee set zix̄a' na' wi'e mecha' gaklenan ben' yesh'ka', lla? Len la' ka che twiz laxj bēnaan zakaan.

6Juda' wne' ka' aga inacho daa chiyeshile' ben' yesh'kan', san daa nake' to ben' wbanan. La' len' gok lall' nee xmeche'ka' na' chbane' lat' wejan. 7Na'ch che' Jesúza'ne':

—Bi wllono' gone' ka'. Ba nzoashao'kze' daa kwenche wgone'n llin kat'ka' kwkash'gake' nad'. 8Ka nak ben' yesh'ka', toshiizin soakz ben'ka' ladjleni, san nad', aga toshiizin soalen' le'.



Ki nak nardona'.

Wloogake' x̄nezin witgake' Lázaroná'

⁹Na' zan ben' Israelka' w̄nezgakile' zoa Jesúza' yell Betániana' na' wyajgake' na'. Per aga wyajgake' yella' ni che toz Jesúzan', san lekzka' kwenche ile'gakile' Lázaroná', beena' bisban Jesúza' ladj ben' wetka'. ¹⁰Na'ch b̄oxzka' ch̄nabia' bengake' toz dill' witgake' len Lázaroná'. ¹¹La' daa biban Lázaroná' ladj ben' wetka', zan ben' Israelka' ben'li'ogake' Jesúza' na' bich bzenaggake' che b̄oxzka'.

Ka biyoo Jesúza' Jerusalénna'

(Mt. 21:1-11; Mr. 11:1-11; Lc. 19:28-40)

¹²Na' betiyo ben' be ben' zil, ben'ka' lle' yell Jerusalénna' daa cha' l̄ni Paskwa', w̄nezgakile' ba ngoo Jesúza' nez yilline' yella'. ¹³Na'ch wyajgake' j̄lezgake'ne' nox'gake' zinka', na' choe'la'ogake'ne', nagake':

—j̄Li we'la'o Chioza! j̄Gonleeyshga X̄ancho Chioza' beeni ba bselee inabi'e cho' ben' Israel!

¹⁴Na' blleli Jesúza' to burr chbando' na' wllie'b. Na' gok kon ka na Cho'a Xtill' Chioza', gana' na:

¹⁵Le' ben' yell Jerusalén, bi illeble.

Li wwia, ni ba za' beena' inabia' le'
na' llie' to burr chbando'.

¹⁶Na' ben'ka' nakgake'ne' txen aga wyajni'gakile' diiki ka lo gora'. Ka bibanch Jesúza' ladj ben' wetka', kana'ch gokbe'gakile' nan Cho'a Xtill' Chioza' daa bzej ben'ka' kani'yi choe'n dill' che', na' che diika' bengakile'ne'.

¹⁷Na' ben'ka' lle'len Jesúza' kana' bisbane' Lázaroná' ladj ben' wetka', ben'ka' bengakile' binie'ne' kwenche bicheje' loo bana', legaken' be'gake' dill' daa bene'. ¹⁸Daan ben' zan jati'lgake' Jesúza' daa bengakile' ka nak yel' waka' bene'. ¹⁹Na'ch fariseoka' che' ljwellgake':

—Li wwia ka ba chak, bibi de goncho. Li wwia, yog'lol̄za ben' ba nogake' le'.

Ba' ben' griegoka' chiyiljgake' Jesúza'

²⁰Ladj ben'ka' wyaj l̄nina' Jerusalénna' je'la'ogake' Chioza' na' len ba' ben' griego. ²¹Na' ben'ki' jabig'gake' gana' ze Felípena',

beena' nak ben' yell Betsaida daa lia yell-lion daa mbani Galileana', na' che'gake'ne':

—Ben'do', cheeninto' we'lennto' Jesúza' dill'.

22Na' Felípena' jelle' Andréza' ka', na' choptie' wyajgake' jellgake' Jesúza' ka'. 23Na'ch che' Jesúza' legake':

—Ba bllin lla, nad', Ben' Bsel' Chioza' Yell-lioni, sho'a balaan xenna'. 24Dii li nia' le', shi to bin che trígona' bi igasha'n loo yona', ka'chokzə kwe'n. Per shi igasha'n loo yona', na' yila'n na' yiyakan dii zan wal. 25Beena' ze wneyi che yel' mban che'na' yell-lioni, len' kwiayee. San beena' chzani yel' mban che'na' bittezə dii gak che', beenan' gat' yel' mban che' zejli kani. 26Nottezə ben' cheenile' gone' xshin'na' chiya' gone' nad' txen. Na' gana' soa', na'kzə soe'. Na' beena' gon xshin'na', Xa'na' kwee le' balaan.

Wdixjee Jesúza' witgake'ne'

27'Naatek chakyeshid' dii wal inlleb. ¿Awnabid' Xa'na' yisle' nad' lawi dga wtil', lla? Bi gak gon' ka', la' ni cheyi dgayen'kzan bid'. 28Na'ch golle':

—Xa, benshki ka shoo balaan.

Na'ch wne Chioza' yabana', chi'e:

—Ba ben' kwenc̄he wyo'a balaan, na' naa gon' ka sho'a balaan sto shii.

29Na' ben'ka' lle' na' bengakile' shii Chioza', na' bale' wnagake' wziiwa'zan wne. Na' zi bale' wna to anjlan' ba wnie' le'.

30Na'ch Jesúza' chi'e legake':

—Aga ni cha' nadaan wne Chioza', san ni che len'. 31Na' ba bllin lla gone' yel' joschis che yog' ben' lle' yell-lioni, na' naa kweje' dii xiwaa daa chnabia' yell-lioni. 32Na' kat'ka' wligake' yaga' cha'lə gana' nda'gake' nad', kanan' gat' latj gonlilall' nottezə ben' nad'.

33Na' daa wne' ka', bzajniile' legake' nakan guete'. 34Na' ben'ka' lle' na' che'gake'ne':

—Ba beninto' chlabgake' Cho'a Xtill' Chioza' gana' nan Crístona', beena' wsel' Chioza' inabi'e, soe' zejli kani. Na' ¿biche nazo' Beena' Bsel' Chioza' Yell-lioni wligake'ne' cha'lə wwia ben' le' lee yaga' gana' dee? ¿Nora Beena' Bsel' Chioza' Yell-lioni no' ka'?

35 Na'ch che' Jesúza' legake':

—Nad' nak' beeni' che ben' yell-lioni, per zi shlollchga soalen' le'. Li sho' lo nez lina' shlak ni de beeni'na' kwenche bi gak che le ka chak che to ben' chalile' kat' ngwee' nez. La' beena' chda' gana' shchol bi nezile' galan zeje'. 36 Li gonlilall' nad' naa shlak ni zoalen' le' kwenche sho' beeni' cha'na' loo yichjall'do'lena'.

Biyoll wna Jesúza' ka' na'ch bizee jakwashi'le' legake'.

Ben' zan ben' Israelka' bi wyajle'gake' che Jesúza'

37 La'kzi ben' Israelka' ble'gakile' ye'l' wak zan daa ben Jesúza', zangake' bi benlilall'gake'ne'. 38 Na' daa bengake' ka', gok ka wna dii Isaíaza', beena' wdixjee daa goll Chioza'ne' kani'yi, daa wne':

Xan' zaoa ben' ba wyajli'e dillaa chyixje'nto'?

Na' zaoa ben' ba gokbe'ile' bli'o ye'l' wak cho'na'?

39 Na' bi wyajle'gake', la' Chioza' bene' chegake' ka na sto dii bzej dii Isaíaza':

40 Bene' legake' ka ben' lchol na' lall'do' chech

kwenche bi gakbe'gakile' bi zejin diika' chle'gakile',
ni bi shajni'gakile' diika' chengakile',

kwenche ki yiyaj yilengakile' na' yiyone' legake' ben'
wen.

41 Wna Isaíaza' ka' daa ble'ile' ka nak balaan xen wala' nap Jesúza', na' bi'e dill' che'.

42 Na' la'kzi ka', ben' zan ben' Israelka' lente no ben' wnabia' che'ka' benlilall'gake' Jesúza'. Per bi be'gake'n dill' daa bllebgame' bich wleb fariseoka' legake' gana' chdop chllaggake' choe'lwillgake' Chioza', 43 la' wyoolall'chgake' ina ben' nakgake' ben' wen aga ka daa ina Chioza' nakgake' ben' wen.

Cho'a xtill' Jesúza' nakan dii llialo

44 Na'ch wne Jesúza' zillj chi'e:

—Nottez ben' chonlilall' nad', aga toz' nadaan chonlilallee, san len beena' bsel' nadaan chonlilallee. 45 Na' nottezə ben' chle'ile' nad', lekzka' chle'ile' beena' bsel' nad'. 46 Zaa yell-lioni kwenche beena' gonlilallee nad' te' lo beeni' cha'na' na' bich soe' lo yel chola'. 47 Na' shi no ben' chenile' cho'a xtillaani na' bi

chone' ka nia', aga nadaan wchogloa' che', la' aga zaa kwenche wchogloa' che ben' yell-lionin, san zaa kwenche yislagakee na' bi kwiayi'gake'. ⁴⁸Beena' bi cheenile' gonlilallee nad' na' bi chzenague' cha', de daa gawan xya che'. Cho'a xtilaana' daa ba bi'a, lennan' gawan xya che' kat' illin lla te che yell-lioni. ⁴⁹La' dillaa daa ba bi'a aga to bia'lozan' wnia' ka'. Xa'na', beena' bsel' nad', len' nllie' bia' bin chiyal' inia' na' bin chiyal' wli' wsedid' ben'. ⁵⁰Na' nezid' dill' daa nllia Xa'na' bia' inia' nsa'n ye! mban zejli kani. Daan, yog'lol' diika' nia', nakan kon ka wna Xa'na' nad'.

Wdib Jesúza' ni'a ben'ka' nakgake'ne' txen

13 ¹Ka ba zoa gal' lni Paskwa', na' nezi Jesúza' ba zoa gao yizee yell-lioni kwenche yiyaje' kwit Xe'na'. Na' chakchgaile' ben'ka' nonlilall'gake'ne' yell-lioni, na' ka' gokile' legake' ax̄t ga zeelo.

²Na' ka chaogake' xshe'na', ba wloolə dii xiwaa loo yichjllall'do' Jud Scariota', xiin Simónna', gone' Jesúza' lo na' ben' malka'. ³Na' nezi Jesúza' Xe'na' bene' lall' nee yog' dii de, na' nezile' wzee gana' zoa Chioza' na' kwite'na'kzə yilline' dii yoblə. ⁴Na' lo zej chaogake' xshe'na', wzolla' Jesúza' na' bkwase' xe' dii tonə' ka'lə, na' bchele' to lech' lsineena'. ⁵Na'ch wdee nisa' to loo sha' na' wzoloe' chyibe' ni'a to to ben'ka' nakgake'ne' txen, na' bisbillile'n lechaa ncheje' lsineena'.

⁶Na' ka bido! chibe' ni'a Simón Pédrona', na'ch che' Pédrona'ne':

—Xan', gali'lə chibzo' ni'ani?

⁷Na' che' Jesúza'ne':

—Aga chajniilo' dga chon' naa, per techlə shajniilo'n.

⁸Na'ch che' Pédrona'ne':

—Bat wi'a latj chibo' ni'ani.

Na'ch che' Jesúza'ne':

—Shi bi chib' ni'ona', bich gako' nad' txen.

⁹Na'ch chize' Pédrona'ne':

—Shi kan' nakan, Xan', aga toz ni'ani chibo' san len yichji na' na'ki.

¹⁰Na'ch che' Jesúza'ne':

—Beena' nosh' nazje', toz ñi'enan' chiyał' shech, la' ba nechkz kwerp che'na'. Ka'kzan le', ba nxi nyechle, la'kzi aga yog'le.

11 Daa ñezi Jesúza' non gon le' lo na' beñ' malka', daan chi'e legake': "Aga yog'le ba nxi nyech."

12 Na' ka biyoll wdibe' ñi'eka', na'ch biyakwe' xe' dii toña' na' jachi'e cho'a mesa' sto shii. Na' chi'e legake':

—¿Añezile bi zejin dga ba ben'? 13 Le' nale nad' Maestro na' Xan', na' lekzile, la' kan' nakan. 14 Na' shi nad', naktia' Maestro chele na' Xanle, ba wdib' ñi'alena', lekzka' le' chiyał' chib ñi'a ljwell-le. 15 Ba ben' dga kwenche bliid' le' kan' chiyał' gon che ljwell-le. 16 Dii li nia' le', aga zak'chi to mos ka xane'na', na' to beñ' zej mandad aga zak'che' ka beena' bseleene'. 17 Shi chajniile diiki ba wnia' na' gonlen, na' soale mbalaz.

18 Na' aga yog'len nia' ka'. Nejid' nolen ba wlej' kwenche nonlilall'le nad'. Na' chiyał' gak ka na Cho'a Xtill' Chioza', gana' na: "Beena' chaolentie' nad' txen ba chiyechje' nad' gone' mal cha'." 19 Naa nia' le' dga zi' gak, kwenche kat' ba chakan shajle'le nak' beena' ba wnia' nak'. 20 Na' dii li nia' le', beena' wlebe' nottezə beena' wselaa, nad'kzan chlebe'. Na' beena' chlebe' nad', lenkz beena' bsel' nadaan chlebe'.

**Wdixjee Jesúza' ka gon Juda'
wdie'ne' lo na' beñ' malka'**

(Mt 26:20-25; Mr. 14:17-21; Lc 22:21-23)

21 Na' biyoll wna Jesúza' ka', le gokyeshii loo yichjlall'do'ena', na' bi'e dill' kwasloł, chi'e:

—Dii li nia' le', tole gonle nad' lo na' beñ' malka'.

22 Na'ch beñ'ka' nakgake'ne' txen chwia ljwellgake' chakgakile' nogaken' chi'e ka'. 23 Na' to beena' nak Jesúza' txen, beena' chakchgaile', chi'e kwite'na'. 24 Na' Simón Pédróna' bene' señ kwenche inabi beena' chi' kwit Jesúza' noen' chi'e ka'. 25 Na'ch jabig'ch beena' gaoch kwit Jesúza' na' wñabile'ne', chi'ene':

—¿Noran gon ka', Xan'?

26 Na'ch che' Jesúza'ne':

—Wleejch' lat' yetxtili lo'i dga yoll loo yeeni, na' kon beena' wi'an, len' gon ka'.

Na'ch bleeje' lat' yetxtila' na' bi'en Jud Scariota', xiin beena' le Simón. ²⁷Na' kon ka biyoll be' Jesúza' Juda' yetxtila', lii wyoote Satanáza' loo yichjall'do'ena'. Na'ch che' Jesúza'ne':

—Daa ba ngoo yichjo' gono', bentegan.

²⁸Na' ni to ben'ka' chaolengake'ne' bi wyajni'gakile' biche gollze'ne' ka'. ²⁹Bale' gokgakile' goll Jesúza' Juda' lljxi'e bi dii chyalljgakile' che xshe' che'ka', wa wi'e lat' mech ben' yesh'ka'. La' len' nak lall' nee xmeche'ka'. ³⁰Na' ka wde wdao Juda' yetxtila' daa be' Jesúza'ne', lii wza'tie'. Na' ba gol' ka wzee.

Dii koba' daa nllia Chioza' bia'

³¹Na' ka wde wza' Juda', na'ch che' Jesúza':

—Ba bllin lla sho'a balaan, nad', Ben' Bsel' Chioza' Yell-lioni, na' lekzka' dga gon', gonan ka sho' Chioza' balaan. ³²Na' daa gon' ka sho' Chioza' balaan, lekzka' kwinn Chioza' gone' kwenche nad', Ben' Bsel' Chioza' Yell-lioni, sho'a balaan, na' lii gontie'n. ³³Le' xiindawaa, zi shlollchga zoalen' le'. Na' yiyilje nad', na' chiznia' le' ka gosh' ben'ka' chnabia' ben' Israelka': Gana' yiyaa, bi gak sa'le. ³⁴Na' to dii kob chllia' bia' gonle naa: Li' gaki ljwell-le. Ka chakid' le', kan' chiyal' gaki ljwell-le. ³⁵Shi gaki ljwell-le, na'ch inezi yog'lolte ben' nakle nad' txen.

Wdixjee Jesúza' bi wcheb Pédrona' shi nombi'ene'

(Mt. 26:31-35; Mr. 14:27-31; Lc. 22:31-34)

³⁶Na'ch Simón Pédrona' wñabile' Jesúza', chi'ene':

—Xan!, ¿garan yiyajo'?

Na' che' Jesúza'ne':

—Aga wak soo gana' yiyaa naa, per wllin lla soo.

³⁷Na'ch che' Pédrona'ne':

—Xan!, ¿berache bi gak sa'len' li' naa? Ba nchoglallaa guet' ni cho'.

³⁸Na' Jesúza' chi'ene':

—¿Achakilo' ba nchoglalloo gueto' ni cha'? Dii li' nia' li', shon shii bi wchebo' shi nombi'o nad' ka zi' kwell-lə shikwteza'.

Jesúza' nake' neza' chillin kwit X̄e' Chioza'

14 ¹Bi gakshejlall'le. Li gonlilall' Chioza' na' lekzka' li gonlilall' nad'. ²Lill xlatj X̄a'na' dii xen latj de. Shel' bi nakan ka', ba wnia' le' ka', shel'ka'. Na' naa yiyaa ljayenshawaa gana' yidzoale. ³Na' kat' ba beshawaan, na'ch yiyed' yidxia' le' kwenche lenle soale gana' zoa'. ⁴Na' ba nombia'le neza' daa chillin gana' ljazoa'.

⁵Na'ch Tomáza' chi'ene':

—X̄an', bi nezinto' gan yiyajo'. ¿Nakran gonnto' yillelinto' neza'?

⁶Na' che' Jesúza'ne':

—Nadaan' neza' daa chillin lao Chioza', na' chli'a daa nak dii li, na' cho'a ben' yel' mban zejli kani. Aga no yillin kwit X̄a'na' shi bi gonlilallee nad'. ⁷Daa ba nombia'le nad', lenkz X̄a'nan' ba nombia'le. Na' naa ba nombia'lene' na' ba ble'ilene'.

⁸Na'ch che' Felípena'ne':

—X̄an', ben ka ile'into' X̄o'na' na' xenlall'nto'.

⁹Na'ch billii Jesúza' xtilleena', chi'e:

—Felipe, ba wlla zoalen' le', ¿ana' bikzan' gombia'yenoo nad'? Beena' ba ble'ile' nad' lekzka' ba ble'ile' X̄a'na'. ¿Berache chñabzo' gon' ka ile'ilene'? ¹⁰¿Abi chajli'o zoalen X̄a'na' nad' na' nad' zoalenee? Diika' nia' le' aga to bia'lozan' chñia'n, san daa cheeni kwin X̄a'na', beena' zoalene' nad', lennan' cho'a dill' na' lennan' chon'. ¹¹Li shajle' daa nia' zoalen X̄a'na' nad', na' nad' zoalen' le'. Na' shi bi chajle'le dga nia', la'ch' li shajle' cha' ni che yel' wakki chle'ile' chon'. ¹²Dii li nia' le', nottez ben' chonlilallee nad', gone' ka diika' chon'. Na' dii zak'techi gone' aga ka diika' chon', daa yiyaa kwit X̄a'na'. ¹³Na' gon' bittez daa inabile X̄a'na' daa nakle nad' txen kwenche sho'e balaan ni cha'. ¹⁴Nad' gon' bittez daa inabile daa nakle nad' txen.

B̄cheb Jesúza' wselee Espíritu Sántona'

¹⁵Shi chakile nad', li gon diika' nllia' bia' gonle. ¹⁶Na' inabid' X̄a'na' wselee sto ben' gaklene' le' na' soalene' le' toshiizi. ¹⁷Len' Espíritu Sántona', beena' chli' daa nak dii li. Na' ben' yell-lioki aga wak wlebgake'ne', la' bi chle'gakile'ne' ni bi nombia'gake'ne'. San

le', ba nombia'lene' daa zoalene' le' na' soe' loo yichjall'do'lena'.
 18Aga wikwaan' le' ka bi' wizeb, san wiyedch' soalen' le'. 19Aga
 chllach bich ile'i ben' yell-lioni nad', san le' wle'chkzile nad'.
 Na' daa mban' toshiizi, lekzka' le' toshiizi ibanle. 20Kat' illin
 llana' nia' ka', na' gakbe'ile zoalen' Xa'na', na' le' zoalenle nad'
 na' nad' zoalen' le'. 21Nottez ben' chzenague' daa nllia' bia' na'
 chone' ka nan, beenan' chakile' nad'. Na' beena' chakile' nad',
 lekzka' gaki Xa'na'ne', na' nad' lekzka' gakidee na' gon' kwenche
 gombia'che' nad'.

22Na' Júdaza' (beena' sto, aga Jud Scariota,) chi'ene':

—Xan', ¿berache to neto'z gonzo' ka gombia'chnto' li' na' bi
 len ben' yell-lioki, ben'ka' bi chonlilall'gake' li'?

23Na' billii Jesús'a' xtilleena':

—Beena' chakile' nad', wzoe' xtillaa, na' Xa'na' gakile'ne', na'
 nad' kon Xa'na' yidsoalennto'ne'. 24Na' beena' bi chakile' nad',
 bi chzoe' xtillaa. Na' diika' chli' chsedid' aga dii chyiljlallzaan,
 san Xa'na', beena' bsel' nad', chzajniile'n nad'.

25'Yog' diiki choe'len' le' dill' naa shlak ni zoalen' le'. 26Na'
 kat' bich soa' len le', Espíritu Sántona', beena' wsel' Xa'na',
 gaklene' le' na' wzajniile' le' yog' dii chiyal' inezile, na' gone'
 ka lljadinile yog' diika' ba wnia' le'.

27'Ye'l' mbalaza' chkwaan'lena'n le'. Na' ye'l' mbalaz cha'na'
 chon' le' bi nakan ka ye'l' mbalaz che ben' yell-lioka'. Bi
 gakshejlall'le, ni bi gall illeble. 28Ba benzkzile nia' yiyaa gana'
 zoa Xa'na' na' lekzka' wiyedchkz' yidzoalen' le'. Na' shi chakile
 nad', chiyal' yibaile daa yiyaa gana' zoa Xa'na', la' zak'che' aga ka
 nad'. 29Na' ba nia' le' diiki zi' gak kwenche kat' gakan shajle'le.

30'Na' bich bitek dill' we'lench' le' naa, la' ba za' dii xiwaa,
 daa chnabia' yell-lioni. Per aga wak inabia'n nad'. 31La' chon'
 kon ka nllia Xa'na' bia' gon' kwenche inezi ben' yell-lioki chakid'
 Xa'na'. Li yizolla'. Li yidó.

Jesús'a' chzaklebi kwine' to yag uva

15 1'Nad' nak' ka yag uva daa nak dowalj, na' Xa'na' nake'
 ka beena' chaz chaan'an. 2Na' yog'lo' xoz' xka'inna' daa
 bi chbia, chchogue'n. Na' diika' chbia, chonshao'che'n kwenche
 zizikli kwian. 3Na' le', nakle ka xoz' xka'inna' daa chbia, daa

bzenagle ka nak dill'ka' be'len' le'. ⁴Li soatezi soa gonle nad' txen, na' ka'kz nad' soatezi soalen' le'. Ka xoz' xka'inna', shi bi ndiḷ nllagan xyaguinna' aga bi chbian, ka'kzan le' shi bi soatezi soale gonle nad' txen bi gak gonle daa chibaid'.

⁵'Nad' nak' ka to yag uva, na' le' nakle ka xoz' xka'inna'. Shi le' soatezi soale gonle nad' txen na' nad' soatezi soalen' le', na' gakte ka xoz' xka'inna' daa chbiachga. Shi le' bi nakle nad' txen aga bi gak gonle. ⁶Beena' bi gone' ka dii le gone' nad' txen, nake' ka xoz' xka'inna' daa ba b̄chogue' na' ibillan, na' yitope'n wzaleen lo yi'na' kwen̄che sheyan.

⁷'Shi le' soatezi soale gonle nad' txen na' toshiizi chzoale xtillaana', li inab daa cheenile na' gakan. ⁸X̄a'na' cho'e balaan̄ kat' chonle dii wenna', na' daa chonle ka', chli'lawin dii li nakle nad' txen. ⁹Ka chaki X̄a'na' nad', ka'kzan chakid' le'. Li soatezi soa gonle nad' txen kwen̄che gakbe'ile chakid' le'. ¹⁰Shi gonle daa nllia' bia' gonle, na'ch gakbe'ile le chakid' le', ka chon' nad', chon' daa nllia X̄a'na' bia' gon', na' ka' chakbe'id' le chakile' nad'.

¹¹'Ba wnia' le' ka' kwen̄che yiba yizaklenile' nad', na' yiyoll yido soale mbalaz. ¹²Na' dgan nllia' bia' gonle: Gaki ljwell-le ka chakid' le'. ¹³Bich bi yeḷ' chaki dii xench de ka che beena' chzani yeḷ' mban che'na' guete' ni che ben'ka' nllaguile'. ¹⁴Len' nakle ben'ka' nllaguid' shi chonle ka nllia' bia' gonle. ¹⁵Bich gon' le' ka mos, la' beena' nak mos aga nezile' bin chon xane'na'. San nakle ben' nllaguid' la' ba bzajniid' le' yog' diika' wna X̄a'na' nad'. ¹⁶Aga len' wlejle nad', san nadaan wlej' le' na' ba bzoa' le' shajle ljenle dii wenna' daa bi te cheyi. Na' X̄a'na' gone' yog' daa inabilene' daa nakle nad' txen. ¹⁷Na' dgan chllia' bia' gonle: Gaki ljwell-le ganga.



Ki nak yag uvana'.

Ben'ka' bi nombia' Chioza' gakzbangakile'
ben'ka' nak Crístona' txen

18'Bibi gakile shi ben'ka' bi nombia' Chioza' gakzbangakile' le', la' nezczile ka'kzan gokzbangakile' nad'. 19'Shel' nakle legake' txen na'ch gaggakile' le', shel'ka'. Per daa ba wlej' le' kwenche gagle nad' txen, daan chakzbangakile' le'. 20'Li lljadini ka ba wniakz' le': "Aga inacho zak'chi to mos ka xane'na'." Ka ba bsak'zi'gake' nad', ka'kzan wsak'zi'gake' le'. Na' shi bzenaggake' cho'a xtillaana', lekzka' wzenaggake' chele. 21'Yog' diikin gongakile' le' daa nakle nad' txen, la' bi nombia'gake' Xa'na' beena' bsel' nad'.

22'Ben'ka' bi nombia' Chioza', aga bi dol' napgake' shel'ka' bi bidye'len' legake' xtilleena'. Per daa ba bidye'len' legake' xtilleena' bi gak inagake' bi chakbe'gakile' chongake' dii mala'. 23'Beena' chakzbanile' nad' lenkz Xa'nan' chakzbanile'. 24'Aga bi dol' napgake' shel'ka' bi bli'a yel' wakka' daa konon' gon ladje'ka'. Na' la'kzi ba ble'gakile' diika' chon', bia'kzə chakzbangakile' nad' na' Xa'na'. 25'Chak dga kwenche chillinin ka na ley che'ka' gana' nan: "Kon gokzi' gokzbangakile' nad' la'kzi aga bi ben' chegake'."

26'Na' wselaa Espíritu che Xa' Chioza', beena' gaklene' le'. Espírituna', beena' chli' daa nak dii li, see gana' zoa Xa' Chioza' na' yidyee xtillaa. 27'Na' lekzka' lenle we'le cho'a xtillaana', la' ba gokle nad' txen ka wzoloa' chli' chsedid' ben'.

16 1'Ba wnia' le' diiki kwenche bi yidinjile' daa chon'ilall'le nad'. 2'La' bich wlebgake' le' gana' chdop chllagcho choe'lwillcho Chioza', na' wllin lla axt wit ben' le' daa gakile' kan' chazlall' Chioza'. 3'Gongake' ka' daa bi nombia'gake' Xa'na', ni bi nombia'gake' nad'. 4'Na' nia' le' diiki kwenche kat' ba blin lla ile'ile yel' zak'zi'ka', lljadinile ka'kzan ba wnia' gak chele. Bi wnia' le' ka' dii nechte daa ni zoalen' le'.

Daa chon Espíritu Sántona'

5'Na' naa yiyaa lljazoalen' Xa'na' beena' bsel' nad', na' ni stole bich chnabile nad' gan yiyaa. 6'Na' daa ba wnia' le' ka' le chakyesh'zi'le'. 7'Per dii li nia' le', wakch wen chele shi yiyaa. La' shi bi yiyaa, beena' gaklene' le' bi yidsoalene' le'. San shi ba

ziyaa, na' wse_laane'. ⁸Na' kat' yide', gone' kwen_çhe gakbe'i ben' yell-lioki nakgake' ben' saaxya daa bi biyombia'gake' beena' nak dowalj ben' li ben' shao', na' gakbe'gakile' chidol'gake' wchoglo Chioza' çhegake' ni çhe xtoleeka'. ⁹Yiyakbe'gakile' napgake' dol' daa bi chon_lilall'gake' nad'. ¹⁰Na' yiyakbe'gakile' nak' ben' li ben' shao' daa ziyaa gana' zoa Xa'na' na' aga wle'chile nad'. ¹¹Na' lekzka' yiyakbe'gakile' Chioza' wi'e yel' zak'zi' çhe ben'ka' bi chzenag çha', la' ba b_çhogloe' sak'zi' dii xiwaa daa ch_nabia' yell-lioni.

¹²Dii zanch de dii in_ia' le', dii bi shajniile naa. ¹³Per kat' ila' Espíritu Sántona', beena' chli' daa nak dii li, len' wzajniile' le' kwas_lol daa nak dii li. La' aga dii çhiljall'ze'n in_e', san in_e' daa che' Xa'na'ne', na' çhixje'ile' le' diika' zi' za' gak. ¹⁴Na' gone' ka sho'a balaan, la' wzajniile' le' diika' ba wnia'. ¹⁵La' yog'lolte daa na Xa'na' lennan' cho'a dill'. Daan nia', Espírituna' wzajniile' le' diika' ba wnia'.

Yel' chakyeshiina' yiyakan yel' xaba

¹⁶Aga chllach bich ile'ile nad', na' lekzka' aga wlla yizle'ile nad'.

¹⁷Na' bal ben'ka' nakgake'ne' txen w_nabi ljwelle':

—¿Bera zejín daa ne' aga chllach bich ile'ichone', na' lekzka' aga wlla yizle'ichone', na' daa natelze' yiyaje' kwit Xe'na'? ¹⁸¿Bi zejín daa naze' “aga chllach”? Bi chajniicho bi_çe naze' ka'.

¹⁹Na' Jesúza' gokbe'ile' cheengakile' in_abgakile'ne' bi zejín daa wne', na'ch chi'e legake':

—¿Achnabi ljwell-le bi zejín daa wnia' le' aga chllach bich ile'ile nad', na' lekzka' aga wlla yizle'ile nad'? ²⁰Dii li nia' le', kwell-le na' gakyeshile shlak ben'ka' bi nombia' Chioza' yibagakile'. Na' la'kzi gakyeshile, yel' chakyeshii çhelena' yiyakan yel' xaba. ²¹Kat' chzan to noolə, chey chle' daa ba bllin gor sane'. Na' ka chiyoll chzane' ni bich chjtinile' yel' chey chlana', daa le chibaile' ba zoa to bi'do' çhe' yell-lioni. ²²Ka'kzan chak çhele. Naa chakyeshile, na' ka yillagcho dii yoblə kanan' yiba yizakile, na' ni to kono wsej wllon yibaile.

²³Na' kana'chan bich bi in_abile nad'. Dii li nia' le', bittezo dii in_abile Xa'na', gon_kze'n, daa non_lilall'le nad'. ²⁴Axt naa ni

to bibin' inabile Xa'na' daa nonlilall'le nad'. Li inab bittez dii cheenile inabilene' na' gonkze'n kwenche yiyoll yido soale mbalaz.

Jesucristona' ba bene' gan daa chnabia' yell-lioni

25' Ba bseesaa jemplka' bzajniid' le' diiki, na' wllin lla kat' bich wzajniid' le' kon jempl, san we'len' le' dill' che Xa'na' ka to shajniilen. 26' Na' kat' ba bllin llana', kanan' inabile Xa'na' bittez dii inabilene' daa nonlilall'le nad', na' bi chonan byen kwini' inabidee gaklene' le', 27' la' kwinkz Xa'na' chakile' le' daa chakile nad' na' daa chajle'le bselee nad'. 28' Wzaa gana' zoa Xa'na' kwenche bid' yell-lioni, na' naa yizaa yell-lioni kwenche yiyaa gana' zoe'.

29' Na' ch che' ben'ka' nakgake'ne' txen:

—Naach ba choo dill' dii najnii, na' bich bi jempl chchino'.

30' Na' chakbe'into' nez nle'ilo' yog'loite, na' aga chonan byen no bi inabzi li', la' ba nezlilo' bin inabile' li'. Daan chajle'nto' dii li zoo gana' zoa Chioza'.

31' Na' che' Jesúza' legake':

—¿Anaach chajle'le? 32' Ba zoa illin lla, wa ba bllinkz llana', illeshlesle na' gala ikaa twej tweje, na' yikwaanle toz'. Per aga tozan' yigaana', la' zoalenkz Xa'na' nad'. 33' Ba wnia' le' yog' diiki kwenche soale mbalaz daa nakle nad' txen. Yell-lioni biya dii yen ile'ile, per li gondiplall', la' ba ben' gan daa chnabia' yell-lioni.

Be'llwill Jesúza' Chioza' che ben'ka' nakgake'ne' txen

17 1' Na' ka wde wna Jesúza' diika', na' blis jalawe'na' bwie' yabalə, na' golle':

—Xa, ba bllin gor illagloa' daa llia bia' wtil'. Wloo nad' balaan, nad' nak' xiino', kwenche lekzka' nad' kwaa li' balaan. 2' La' ba beno' lo na' inabia' lao yog'lol ben', kwenche gon' ka gat' ye' mban zejli kani che ben'ka' wlejo' gonlilall'gake' nad'. 3' Na' daa gat' ye' mban zejli kani che ben', zejlin nombia'gake' li', nako' dowalj Chios, na' lekzka' nombia'gake' nad', ben' bseloo yell-lioni.

4' Nad' ba wlo'a li' balaan lao ben' yell-lioki, na' ba biyoll ben' daa bllio' bia' gon'. 5' Na' naa, Xa, yiyongacho' nad' balaanna' kat' yiyed' kwito'na' ka balaanna' daa wdpakz' kana' wzoalen' li' ka zi' xe sil yell-lioni.

6'Ba beno' nad' ben'ki wlejo' yell-lioni kwenche gonlilall'gake' nad', na' ba bzajniid' legake' ka nako'. Lall' non' nakgake', na' beno' ka benlilall'gake' nad' na' chzenaggake' xtilloona'. 7'Na' naa ba nezgakile' yog' dill'ka' bi'a nakan dii wno'. 8'La' ba be'len' legake' dill' daa nllio' bia' we'lengakee na' ba bzenaggake'n. Na' ba gokbe'gakile' dii li wzaa gana' zo' na' ba wyajle'gake' lin' bse'loo nad'.

9'Chnabid' li' gakleno' legake'. Aga chnab' gakleno' yog' ben' yell-lioki, san chnab' gakleno' ben'ka' wlejo' kwenche gonlilall'gake' nad', la' lall' non' nakgake'. 10'Na' yog' ben'ka' nak lall' na' lekzka' nakgake' lall' no'. Na' legake' ba wloogake' nad' balaan.

11'Na' naa ba chiza' yell-lioni. Na' legake' yigaangake' ni. Xa, li' nako' dowalj ben' wen ben' shao'. Wdapgach ben'ka' ba beno' nonlilall'gake' nad' kon yel' wak cho'na' kwenche gaggake' toz, ka nakcho cho' nakcho toz. 12'Shlak wzoalen' legake' yell-lioni ba wdap bwia' legake' kon yel' wak cho'na'. Na' ni toe' bi wlliyai', letechokzə beena' ba nakan kwiaayee, kwenche gak ka na Cho'a Xtilloona'.

13'Na' naa ba zizaa gana' zo'. Na' nia' li' diiki shlak ni zoa' yell-lioni kwenche ben'ki gapgake' yel' xaba ka daa nap'. 14'Nad' ba bzajniid' legake' cho'a xtilloona', na' ben'ka' bi nombia' li' chakzi' chakzbangakile' legake' daa bi nakgake' legake' txen, ka chon' nad' bi chon' txen ben'ka' bi nombia' li'. 15'Aga chnabid' li' yikoo ben'ki nonlilall' li' lo yell-lioni, san chnab' wkweejgachgako'ne' kwenche ki chitj seni dii mala' daa chda yell-lioni legake'. 16'Bi nongake' txen ben'ka' bi nombia' li', ka chon' nad' bi chon' ben'ka' txen. 17'Bengach kwenche ben'ki nonlilall' nad' gakchgake' ka chazlalloo daa chzenaggake' dill' li cho'na', la' cho'a xtilloona' nakan dii li. 18'Ka beno' bse'loo nad' kwenche bidsoa' yell-lioni, ka'kzan chselaa legake' kwenche shajgake' ladj ben' yell-lioki. 19'Chzanlallaa kwin' gon' ka no' ni chegake', kwenche lekzka' gongake' ka no' daa ba chzenaggake' dill' li cho'na'.

20'Aga chnabid' li' gakleno' to lezgake', san lekzka' chnab' gakleno' ben'ka' gonlilall' nad' kat' wzenaggake' cho'a xtillaana' daa we' ben'ki. 21'Xa, chnabid' li' gonshgo' ka gak yog'gake' toz, ka nakcho cho' nakcho toz. Lekzka' chnab' gaggake' cho' toz

kwenche ben'ka' bi nonlilall' li' shajle'gake' lin' bseloo nad'. ²²Ba wlo'a legake' balaan ka daa wloo nad', kwenche gaggake' toz ka nakcho cho' nakcho toz. ²³Nad' naggakee toz ka nakcho cho' nakcho toz. Bengach ka gaggake' toz ka chiyal', kwenche ben'ka' bi nonlilall' li' gakbe'gakile' lin' bseloo nad', na' gakbe'gakile' chakilo' ben'ka' nonlilall' nad' ka chakilo' nad'.

²⁴Xa, li' ba beno' nad' legake', na' cheenid' soalengake' nad' gana' soa' kwenche ile'gakile' balaan cha'na' daa beno' nad' ka zi' xe silte yell-lioni daa chakilo' nad'. ²⁵Xa, li' nako' ben' li' ben' shao'. La'kzi ben'ka' bi nonlilall' nad' bi nombia'gake' li', nad' nombi'a li' na' ben'ki nonlilall' nad' nezgakile' lin' bseloo nad'. ²⁶Na' ba bzajniid' legake' non nako', na' zizikli wzajni'chgakidee kwenche kon ka chakilo' nad' ka'kzə gaggakile' ben', na' nad' soalenkzgagee.

Bex'gake' Jesúza'

(Mt. 26:47-56; Mr. 14:43-50; Lc. 22:47-53)

18 ¹Na' ka biyoll wna Jesúza' ka', wza'lene' ben'ka' naggake'ne' txen wyajgake' shlaa yao Cedrónna', na' wyoolene' legake' to yell-lio ga lle' lla' yag olivo. ²Na' Juda',



Ki nak yag olivona'.

beena' bene' Jesúza' lo na' ben' malka', lekzka' nombi'e latja', la' Jesúza' zan shii wyajlene' legake' na'. ³Na' bllinlen Juda' ben' zan soldad na' zi xonj ben'ka' chap yoodo'na', ben'ka' bsej' bxozka' chnabia' len fariseoka'. Zejgake' nox'gake' no kandil, no yi' yech, na' dii wniagakile'. ⁴Na' Jesúza' ba nezkzile' yog' daa zi' gak che', na'ch bcheje' jatile' legake', na' chi'e:

—¿Non chiyiljle?

⁵Na' che'gake'ne':

—Jesús, ben' Nazaretan', chiyiljnto'.

Na'ch che' Jesúza' legake':

—Nadaan'.

Na' lengake' Juda', beena' bene' le' lall' na'gake'. ⁶Na' ka goll Jesúza': “Nadaan”, to biza'zgake' jayetgake' wza'che'lə. ⁷Na'ch wznabi Jesúza' legake':

—¿Noran chiyiljle?

Na' che'gake'ne':

—Jesús, ben' Nazaretan'.

⁸Na'ch che' Jesúza' legake' sto shii:

—Ba wniakz' le' nadaan. Na' shi nadaan chiyiljle, li we' latj yiyaj ben'ki.

⁹Golle' legake' ka' kwenche billinin daa wne': “Xa, ba wdap' ben'ka' beño' nad' na' ni toe' bi wlliyai'.” ¹⁰Na' Simón Pédrona' no'e to spad, na'ch wleje'n bhogue' tlaa nag to ben' le Malco, de shlina'. Na' Málcona' nake' xmos bxoz choo bxoz xenna'. ¹¹Na'ch che' Jesúza' Pédrona':

—Bigoo spad cho'na' loo lillinna'. La' chonan byen gak cha' daa ba nllia Xa'na' bia' gak.

Jwa'gake' Jesúza' lao Anáza'

(Mt 26:57-58; Mr. 14:53-54; Lc 22:54)

¹²Na'ch soldadka' len xane'ka', na' ben'ka' chap yoodo' che ben' Israelka', bex'gake' Jesúza' na' bchejgake'ne'. ¹³Na' zigaate jwa'gake'ne' lao Anáza' xtobiin che Caifáza', na' Caifáza' nake' bxoz choo bxoz xen lo yiza'. ¹⁴Na' Caifáza', len' beena' golle' ben'ka' chnabia' ben' Israelka' wenchlan witgake' toz Jesúza' aga ka daa kwiayi' yog' ben' wlall che'ka'.

Bi b̄heb Pédróna' shi nombi'e Jesúza'

(Mt 26:69-70; Mr. 14:66-68; Lc 22:55-57)

15 Na' Simón Pédróna' len sto beṇ' nake' Jesúza' txen janogake'ne'. Na' beena' zejlen Pédróna' txen nombia' b̄xoz choo b̄xoz xenna'ne', daan gok wyoolene' Jesúza' lesh' chyoo c̄he b̄xoz choo b̄xoz xenna'. 16 Na' Pédróna' wzie' cho'a leeja'. Na'ch beena' nombia' b̄xoz choo b̄xoz xenna', bicheje' jashaljlene' bi' nool wewaa chap cho'a leeja' kwen̄che be'b' latj wyoo Pédróna'. 17 Na'ch bi' nool wewaa chap cho'a leeja' che'b' Pédróna':

—¿Aaga lenon' nako' beeni txen?

Na' che' Pédróna'b':

—Bi len' nakee txen.

18 Na' moska' len beṇ'ka' chap yoodo'na' wlekgake' yi'na' kwen̄che wbillgake' daa ba chak zag. Na' jselen Pédróna' legake' cho'a yi'na' kwen̄che billa'ile'.

Wṇabyolli Anáza' Jesúza'

(Mt 26:59-66; Mr. 14:55-64; Lc 22:66-71)

19 Na' beena' nak b̄xoz choo b̄xoz xen wṇabyollile' Jesúza' no beṇ'ka' nakgake'ne' txen na' beran chli' chsedile'. 20 Na' che' Jesúza'ne':

—Ladj lkwe' beṇaan ba bi'a dill'. Ba bli' b̄sedid' beṇ' lesh' chyoodo'na' na' gachl̄o chdop chllag beṇ' wlallka' choe'l̄willgake' Chioza'. Na' bibi dill' bi'a do ngash'z̄ə. 21 ¿Berac̄he chṇabzilo' nad'? Wṇabi beṇ'ka' ba bli' b̄sedid' kwen̄che in̄agake' li' beran ba goshgakee. L̄a' nezgakile' bin ba bli' b̄sedid' legake'.

22 Na' ka wde wna Jesúza' ka', to beṇ'ka' chap yoodo'na' wdape' x̄agueena', chi'ene':

—¿Bic̄he chilliizo' b̄xoz choo b̄xoz xenni dill'?

23 Na' che' Jesúza'ne':

—Shi bi dii mal ba wnia', wnashki beran ba wnia'. Na' shi sh̄likzan ba wnia', ¿berac̄he chitzo' nad'?

24 Na'ch de nchejzi Jesúza' bde Anáza'ne' lao Caifáza', beena' nak b̄xoz choo b̄xoz xen.

Sto shii bi b̄cheb Pédrona' shi nombi'e Jesúza'

(Mt. 26:71-75; Mr. 14:66-72; Lc. 22:58-62)

25Na' shlak ze Pédrona' chshee cho'a yi'na', ben'ka' lle' na' che'gake'ne':

—¿Aaga lenon' nako' beeni txen?

Na' bi b̄chebe', san chi'e:

—Bi nakee txen.

26Na' to xmos b̄xoz choo b̄xoz xenna', beena' nak bish' ljjwell beena' b̄chog Pédrona' nague'na', chi'ene':

—¿Aaga lenon' ble'lenid' Jesúza' gana' lle' yag olívoka'?

27Na' stokzə bi b̄cheb Pédrona', na' lii wchellte shikwteza'.

Bdegake' Jesúza' lao Pilátona'

(Mt. 27:1-2, 11-14; Mr. 15:1-5; Lc. 23:1-5)

28Na' cheeni'lesdo' bichejgake' lill Caifáza' na' biche'gake' Jesúza' gana' chon Pilátona' yel' joschisa'. Na' ben' Israelka' aga wyoolengake' Jesúza' gana' chon Pilátona' yel' joschisa', la' aga wak gaogake' daa chsini'agake' che Paskwa' shi ba wyoogake' loo yooná'. 29Na'ch bchej Pilátona' chi'e legake':

—¿Bi xyan chaole che beeni?

30Na' che'gake'ne':

—Shel' bibi dii mal chone' aga widwa'nto'ne' lawo' ni, shel'ka'.

31Na'ch che' Pilátona' legake':

—Li yichi'e na' li gon yel' joschis che' kon ka na ley chelena'.

Na' ben'ka' chñabia' ben' Israelka' che'gake'ne':

—Aga bi lsens chento' de witnto' ben'.

32Na' daa gok ka', billinin ka wna Jesúza' gak kat'ka' guete'.

33Na'ch biyoo Pilátona' gana' chone' yel' joschisa', na' goxe' Jesúza' chi'ene':

—¿Alin' nako' ben' wñabia' che ben' Israelki?

34Na' che' Jesúza'ne':

—¿Adii chza'z lalloon no' ka'? ¿Awa ben' yoblan ba be'lene' li' xtillaana'?

35Na'ch che' Pilátona'ne':

—¿Achakilo' ben' Israel nad'? Ben' wllal cho'kikzan na' b̄xozka' chñabia' le', ba bengake' li' lo na'. ¿Beran beno'?

36 Na'ch che' Jesúza'ne':

—Aga nak ye'l wñabia' cha'na' ka che ben' yell-lioki. Shel' nakan ka', ben'ka' nak nad' txen wllongake' nad' kwenche bi gox' ben' wllal' cha'ki nad', shel'ka'. Per aga nak ye'l wñabia' cha'na' de yell-lioz.

37 Na'ch che' Pilátona'ne':

—¿Ana' ben' wñabia'kzan nako', shka'?

Na' che' Jesúza'ne':

—Awe, kan' nakan. Ni cheyi daan golj' na' bid' yell-lioni, kwenche wi'a dill' daa nak dii li. Na' yog'lol' ben'ka' chzenaggake' dill' lina', chzenaggake' cha'.

38 Na'ch che' Pilátona'ne':

—¿Beran nak dill' li?

Bchoglogake' guet Jesúza'

(Mt. 27:15-31; Mr. 15:6-20; Lc. 23:13-25)

Na' ka wde goll Pilátona'ne' ka', na'ch bizcheje' kwenche jashaljlene' ben' wñabia' che ben' Israelka', na' chi'e legake':

—Ni to dii mal bi chillelid' chon beeni. 39 Na' kon ka yoolole chak yog' yiz chsan' to ben' de lillyana' kat' chal' lni Paskwi, ¿abi cheenile yisan' ben' wñabia' cheleni, le' nakle ben' Israel?

40 Na'ch yog'gake' besyaagake' zillj, che'gake'ne':

—¡Aga beenan' yisano'! ¡Barrabázan' bisan!

Na' Barrabáza' nake' to ben' wban.

19 1 Na' ka' gok ben Pilátona' mandad bet wdingake' Jesúza'. 2 Na' soldadka' bengake' to bxoön de xis yesh' na' bllingake'n yichje'na' ka corona na' bwakwgake'ne' to lech' de morad. 3 Na'ch wbig'gake' lawe'na' chtitjgakile'ne', chongake' ka ben' chgoo le' balaan, che'gake':

—¡Toshiizi sechgayi che beeni chñabia' ben' Israelka'!

Na' wdapgake' xagueena'.

4 Na'ch bizchej Pilátona', chi'e ben' Israelka':

—Li wwia, ni kwejee kwenche inezile ni to dii mal bi chillelid' bene'.

5 Na' bchej Jesúza' mbinte bxoön de xis yeshaa yichje'na' na' nakwtie' lech' morada'. Na'ch che' Pilátona' legake':

—Ni ze beeni chaole xya cheyin.

6Na' b̥xozka' ch̥n̥abia' na' beṅ'ka' chap yoodo'na' ka ble'gakile'ne', na'ch wzologake' chosyaagake' zillj, che'gake':

—¡Bdee lee yag cruza'! ¡Bdee lee yag cruza'!

Na' che' Pilátona' legake':

—Li yichi'e, shka'. Na' li wdee, le'. La' nad', ni to dii mal bi chillelid' bene'.

7Na' beṅ' w̥n̥abia' che beṅ' Israelka' che'gake'ne':

—De to ley ch̥ento' daa na chiya! guete' daa nalze' nake' Xiiṅ Chios.

8Na' ka gollgake' Pilátona' ka', zizikchli b̥llebe'. 9Na'ch biyo'e sto shii gana' chone' ye! jos̥chisa' na' chi'e Jesúza':

—¿Gara beṅ' li'?

Na' Jesúza' bikzə bi dill' billi'e.

10Na'ch che' Pilátona'ne':

—¿Berache ki chilli'o xtillii? ¿Abi ne̥zilo' nap' ye! w̥n̥abia' kwenche wdaa li' lee yag cruza' na' naptia' ye! w̥n̥abia' kwenche yisan' li'?

11Na'ch che' Jesúza'ne':

—Aga bi ye! w̥n̥abia' napo' bi gonilo' nad' she! bi non̥ Chioza'n li'. Daan, beena' b̥die' nad' lawo' ni, dol' xench nape' aga ka li'.

12Na'ch ka beni Pilátona' wne' ka', biyiljallee naklə ka gone' kwenche yisane' Jesúza', per beṅ'ka' ch̥n̥abia' beṅ' Israelka' axt̥ chosyaayigake', che'gake'ne':

—Shi yisano'ne' bi nako' txen Césara', la' nottez beena' ina nake' beṅ' w̥n̥abia', Césaran' chizoshi'e.

13Na' ka beni Pilátona' gollgake'ne' ka', bizcheje' n̥chi'e Jesúza'. Na'ch j̥chi'e gana' chone' ye! jos̥chisa', gana' le Gábata de dill' hebreo, na' zejin latj ga ntaogake' yaj. 14Na' gok dga llana' chsini'agake' che l̥ni Paskwa'. Na' ka do gobill goll Pilátona' beṅ' Israelka':

—Ni ze beṅ' w̥n̥abia' ch̥eleni.

15Na'ch legake' chosyaagake'. Zeyidgake', che'gake':

—¡Wdoyo beena'! ¡Bdee lee yag cruza'!

Na'ch che' Pilátona' legake':

—¿Acheenile wi'a lsens wda'gake' beṅ' w̥n̥abia' ch̥eleni lee yag cruza'?

Na' b̥xozka' ch̥n̥abia' che'gake'ne':

—Toz Césarana' chñabi'e neto'. Koch no ben' yoblə zoa.

16 Na'ch Pilátona' bene' Jesúza' lo na'gake' kwenche wda'gake'ne' lee yag cruza', na'ch bche'gake'ne'.

Bda'gake' Jesúza' lee yag cruza'

(Mt 27:32-44; Mr. 15:21-32; Lc 23:26-43)

17 Na'ch bwa'gake' Jesúza' yag cruz che'na', na' bche'gake'ne' gana' le Gólgota de dill' hebreo, na' zejin Latj che lilit yichj ben' wet. 18 Na' na' bda'gake' Jesúza' lee yag cruza', na' lekzka' bda'gake' zi twej ben' shlaa wej. 19 Na' Pilátona' bzeje' to dii bda'gake' yichj yag cruz che Jesúza', na' nan ki: “Jesús, ben' Nazaret, ben' wñabia' che ben' Israelka'.” 20 Na' bzeje'n dill' hebreo, dill' latín na' dill' griego. Na' zan ben' Israelka' blabgake' daa da' yichj yag cruza', la' gana' bda'gake' Jesúza' lee yag cruza' chgaanān gaozə yell Jerusalénna'. 21 Daan bñozka' chñabia' ben' Israelka' gollgake' Pilátona':

—Bi chiyal' inan “Ben' wñabia' che ben' Israelka'”; san inan “Beenin nalze' nake' ben' wñabia' che ben' Israelka'.”

22 Na' Pilátona' chi'e legake':

—Kon ka ba bzeja'n, ka'kzan igaanān.

23 Na' biyoll bda' soldadka' Jesúza' lee yag cruza', na'ch bex'gake' xe'na' na' bengake'n taplə kwenche bikaa twej chegake'. Na' lekzka' bex'gake' xe' dii toña' daa nak to shwilizə. 24 Na' che' ljwellgake':

—Bi wxoxjchon, san goncho to wyitj kwenche ila'shki nocho ikaan.

Na' ka' ben soldadka'. Na' daa bengake' ka', billinin ka na Cho'a Xtill' Chioza' gana' na: “Biłagake' xa'na', na' bengake' to wyitj kwenche got'bia' nogake' wkaan.”

25 Na' kwit yag cruz che Jesúza' ze xñeena' len ben' bile'na', na' len María, xool Cleófaza', na' María ben' yell Magdálana'. 26 Na' ka ble'i Jesúza' xñeena', na' lekzka' ble'ile' gaozə ze to beena' nake'ne' txen, beena' le chakile', na'ch chi'e xñeena':

—Beenin yiyoni xiño' ñaa.

27 Na'ch chi'e beena' nake'ne' txen:

—Beenin yiyoni xnoo ñaa.

Na' lo llana' biçhi'e xña' Jesúza' wzoe' lille'na'.

Wit Jesúza'

(Mt. 27:45-56; Mr. 15:33-41; Lc. 23:44-49)

28Na' ka wde, nezi Jesúza' ba gok yog' daa llia bia' gaka, na' kwenche yillinin ka na Cho'a Xtill' Chioza', wne':

—Chbilid'.

29Na' na' zoa to xwag nakan tolla' vino dii nak zichj zla'. Na'ch bleejgake'n to dii chzi' nisa' na' bzoagake'n to lo xis^c kwenche bzoagake'n cho'ena'. 30Na' wde weej Jesúza' daa nak zichj zla', na'ch wne':

—Ba gok yog' daa llia bia' gak naa.

Na' bchek' yichje'na', na' wite'.

To soldad wllibe' to ya dii nla' lawinna' kwit lee Jesúza'

31Na' ben'ka' chnabia' ben' Israelka' bi goongakile' yigaan kwerp che ben'ka' lee yag cruzka' llana' chombaangake'. Daan gollgake' Pilátona' gone' mandad lljtishjgake' ni'a ben'ka' da' lee yag cruza' kwenche yob guetgake' na' yiletjgake' kwerp che'ka' lee yag cruzka'. 32Na'ch bselee soldad che'ka', na' jtishjgake' chop laate ni'a ben' necha' da' kwit Jesúza', na' lekzka' bengake' che beena' sto da' zi shlaa kwite'na'. 33Na' ka jabig'gake' gana' da' Jesúza' ble'gakile' ba wite', na' bi wdishjgake' ni'ena'.

34Na' to soldada' wllibe' to ya lo tosh' kwit li'ena' na' lii bchejten chen len nis. 35Na' beena' choe' dill' cheyi diiki, len' ble'ile' ka gok, na' cho'e dill' kwenche lenle shajle'le. Na' le' nezile' dill' lin cho'e. 36Gok diiki kwenche billinin ka na Cho'a Xtill' Chioza' gana' na: “Ni to llitka' yo'e bi chishjgake'.” 37Na' gan yoblə lee Cho'a Xtill' Chioza' chiznan: “Wwiagake' beena' wllibgake' yana'.”

Bkwash'gake' Jesúza'

(Mt. 27:57-61; Mr. 15:42-47; Lc. 23:50-56)

38Na' ka wde gok diiki, José ben' yell Arimatéana', wnable' Pilátona' wi'e latj yikee kwerp che Jesúza'. Joséna' goke' txen

^c 19:29 To lo xis: literalmente en una rama de hisopo.

Jesúza' do ngash'zə daa bllebe' beṅ'ka' chṅabia' beṅ' Israelka'. Na' Pilátona' bi'e latj, na'ch wyaj Joséna' bikee kwerp che Jesúza'. 39Na' wyajlene' Nicodémona', beena' wyaj jawia Jesúza' wal-lə. Na' no'e ka do shichoa kil dii chla' zix daa nongake' de mirra na' nchixan daa le áloe. 40Na'ch btobgake' kwerp che Jesúza' to lech' ton na' blla'gake'n daa chla' zix, kon ka chon beṅ' Israelka' kat' chkwash'gake' to beṅ' wet. 41Na' gaozə gana' bda'gake' Jesúza' lee yag cruza' de to latj ga nazgake' yag dii chbia dii zix, na' na' zoa to blej kob dii biṅ' koogake' ni tlish' beṅ' wet. 42Na' daa chakbyengakile' wsini'agake' che llana' chombaṅgake', lii wlootegake' kwerp che Jesúza' loo bleja' zoa gaozə na'.

Biban Jesúza' ladj beṅ' wetka'

(Mt. 28:1-10; Mr. 16:1-8; Lc. 24:1-12)

20 1Na' lla nech che xmanna', ni shtedo', wyaj María nool Magdálana' cho'a bana'. Na' ble'ile' bich nkwash' yaja' cho'a bana'. 2Na'ch bizee ziyajdoe' gana' zoa Simón Pédróna' na' sto beena' nak Jesúza' txen, beena' le gokile', jayelle' legake':

—Ba jalejgake' Xanchona' loo bana' na' bi nezinto' galə jaloogake'ne'.

3Na'ch wza' Pédróna' len beena' sto zejgake' cho'a bana'. 4Choptie' zejdogake', per beena' to bxonjche' aga ka Pédróna' na' zigaate le' blline' cho'a bana'. 5Na' bchekee bwie' loo bana' na' ble'ile' lech'ka' chi' na', per bi wyo'e. 6Na' ka bllin Simón Pédróna' na' wyo'e loo bana' na' lekzka' ble'ile' lech'ka' chi' na'. 7Na' lecha' bdob yichje'na' aga lenan chi' kwit lech'ka', san ndoban chi'n ka'lə. 8Na'ch lekzka' wyoo beena' bllin dii nech cho'a bana', na' ka ble'ile' diika' na' wyajli'e dii li biban Jesúzan'. 9La' kana' aga ba wyajni'yen'gakile' Cho'a Xtill' Chioza' gana' cho'en dill' yiban Jesúza' ladj beṅ' wetka'. 10Na'ch beṅ'ka' chop non Jesúza' txen biyajgake' gana' zoagake'.

Jali'lao Jesúza' María, beṅ' yell Magdálana'

(Mr. 16:9-11)

11Na' Maríana' bigaane' cho'a bana' chbelle'. Na' lo zej chbelle' bchekee kwenche bwie' loo bana'. 12Na' ble'ile' chop anjl zoagake'

do xtil, chi'gake' loo bana', toe' chi' yichjinna' na' stoe' chi' xni'alin gana' got' kwerp che Jesúza'. ¹³Na'ch che'gake' Maríana':

—¿Berache chbellzo', noolə?

Na' golle' legake':

—Chbell' daa ba bidlejgake' kwerp che Xan'na', na' bi nezid' galə jaloogake'ne'.

¹⁴Shintg wne' ka', ka bllii jalawe'na' na' ble'ile' ze Jesúza' kolleena', per bi biyombi'e shi Jesúzan'. ¹⁵Na'ch che' Jesúza'ne':

—¿Berache chbellzo', noolə? ¿Nodaa chiyiljo'?

Na' Maríana' chakile' beena' chap yag zixkan', na' chi'ene':

—Ben'do', shi ba bibejo'ne', wnagach nad' galə jadixjo'ne' kwenche yichi'ane'.

¹⁶Na'ch che' Jesúza'ne':

—¡María!

Na' biyechje' na' wnie'ne' dill' hebreo, chi'ene':

—¡Raboni! —na' zejin: ben' chli' chsedi ben'.

¹⁷Na' che' Jesúza'ne':

—Bi goxoo nad', la' bin' yiyep' kwit Xa'na'. Lete biyaj, jane ben'ka' nak nad' txen jayellgake' ba ziyaa kwit Xa'na', beena' lekzka' nak Xale. Lljazoalen' Chios cha'na', beena' lekzka' nak Chios chele.

¹⁸Na'ch biza' María, ben' yell Magdálana', jayelle' ben'ka' nak Jesúza' txen nan ba ble'ile' Xancho Jesúza'. Na' golle' legake' diika' goll Jesúza' le'.

Jali'lao Jesúza' ben'ka' nakgake'ne' txen

(Mt 28:16-20; Mr. 16:14-18; Lc 24:36-49)

¹⁹Na' ka gol lo llana' bibane', lla nech che xmanna', ba ndop nllag ben'ka' nak Jesúza' txen na' nsejtegake' yoonaa daa chllbegake' ben'ka' chnabia' ben' Israelka', ka gokbe'gakile' ba ze Jesúza' ladje'ka', na' chi'e legake':

—Soashgale mbalaz.

²⁰Na' ka biyoll golle' legake' ka', na'ch bliile' legake' chop laate neena' na' kwit li'ena'. Na' ben'ka' nakgake'ne' txen le bibagakile' ble'gakile'ne'. ²¹Na'ch wize' Jesúza' legake':

—Soashgale mbalaz. Ka bsel' Xa'na' nad' kwenche zidsoa' yell-lioni, ka'kzan chselaa le' lje'le cho'a xtilaana' yell-lioni.

22Na' ka wde golle' legake' ka', na'ch blobe' legake', na' chi'e:
—Li ikaa Espiritu Sántona'. 23Na' ben'ka' yizi'xenle saaxya
che'ka', wiyakxenan. Na' ben'ka' bi yizi'xenle cheyin, bi yiyakxen
chegake'.

Tomáza' bi wyajli'e shi biban Jesúza' ladj ben' wetka'

24Tomáza', beena' che'gake' Dídimo nake' txen ben'ka' shllin,
na' bi lene' ka jali'lao Jesúza' legake'. 25Na' che'gake'ne':

—Ba ble'into' Xanchona'.

Na' Tomáza' chi'e legake':

—Shi bi ile'id' neena' na' wde xben'ni gana' wde klabka', na'
wde na'ni kwit li'ena', aga wyajli'a.

26Na' ka wde xon' lla, dii yoblə bidop ben'ka' nongake' Jesúza'
txen loo yooná' na' len Tomáza'. Na' la'kzi nsejtegake' yooná',
wyoo Jesúza' jsie' ladje'ka'. Na' chi'e legake':

—Soashgale mbalaz.

27Na'ch chi'e Tomáza':

—Bwia na'ni, na' bne'n xbeno'na'; na' bne' noona' kwit li'ani.
Bi gakchoplaloo, san wyajle'.

28Na'ch che' Tomáza'ne':

—jLin' nako' Xan' na' naktio' Chios cha'!

29Na' che' Jesúza'ne':


—Gaj ble'ilo' nad' na'ch chajli'o. Chakomba ben'ka' chajle'gake'
la'kzi bin' ile'gakile' nad'.

**Bzej Juanna' libri kwenche shajle' ben'
Jesúza' nake' Xiin Chios**

30Zan yel' wak daa ben Jesúza' lao ben'ka' nakgake'ne' txen
bi nyojgakan lee libri. 31Per diiki nyojgakan kwenche shajle'le
Jesúza' nake' Xiin Chioza' na' len' Crístona', beena' wleje' inabi'e,
na' daa gonlilall'lene' gat' yel' mban chele dii bi te cheyin.

Jali'lao Jesúza' ben'ka' nakgake'ne' txen

21 1Ka wde, Jesúza' jali'lawe' sto shii ben'ka' nakgake'ne'
txen cho'a Nisdo' che Galileana' daa lekzka' le Nisdo'
che Tiberias. Na' ki gok: 2Simón Pédróna' len Tomáza', beena'
nsi'gake' Dídimo, na' Natanaela', ben' yell Canána' daa llia gana'



Xonj ben' chzengake' belka'.

mbani Galileana', na' chopte xiin Zebedewa' na' zi chop ben'ka' nongake' Jesúza' txen lle'gake' Galileana'. ³Na' Simón Pédróna' chi'e legake':

—Sha'ch' lljxen' bel'a'.

Na' legake' gollgake'ne':

—Lekzka' wza'lennto' li'.

Na'ch wyoogake' to loo barkw zejgake' wxen bel'a', na' ni tlish' kono wxengake' do yel. ⁴Na' cheeni'lesdo' bllin Jesúza' cho'a niso'dna', na' ben'ka' nakgake'ne' txen aga chakbe'gakile' shi len'. ⁵Na'ch Jesúza' wnie' legake', chi'e:

—Le' ben' bish'dawaa, çabin' senle bel'a' gaocho?

Na' che'gake'ne':

—Aga no de.

⁶Na'ch che' Jesúza' legake':

—Li wza'! yixj çhelena' shlaa de shli çhe barkwa' na' idol'gakb.

Na' bengake' ka golle', na' ka nan yigoyogake' yixja' loo nisa' aga chizogakile'n daa nyichachgan belka'. ⁷Na' beena' le chaki Jesúza'ne', golle' Pédróna':

—j̄Xanchonan!

Na' kon ka beni Pédrona' golle'ne' ka', lii biyakwte xe'na', na' bxitee loo nisa'. ⁸Na' ben'ka' sto biyajlengake' barkwa' cho'a nisdona'lə, zingoyon yixja' daa zinyichachga belka', la' aga nakchan zit', ka sto guiyoa metrzan. ⁹Na' ka bichejgake' loo barkwa', ble'gakile' ba chi' yi'na' x̄na na' xoa to bel lawinna', na' dete yetxtil. ¹⁰Na' che' Jesúza' legake':

—Li yiyox'to belka' zi' wxenle.

¹¹Na'ch wyoo Simón Pédrona' loo barkwa' kwenche jassel'e yixj bel'a' na' bigoyoe'n ax̄t cho'a nisdona'. Na' la'kzi tolla'cha nak yixja' daa ziyoon to guiyoa shiiniyon bel yelka', bi bcheza'n. ¹²Na'ch che' Jesúza' legake':

—Li da gaole xsila'.

Na' ni to ben'ka' nakgake'ne' txen bi biyaxjgakile' ye'gake'ne': “¿Nora li'?” La' gokbe'gakile' X̄ancho Jesúza'kzan'. ¹³Na'ch wbig' Jesúza' na' bexee yetxtila' len bel'a' na' bi'e che chegake'.

¹⁴Na' dga gok de wyon shii jali'lao Jesúza' ben'ka' nakgake'ne' txen ka wde bibane' ladj ben' wetka'.

Bshaljlen Jesúza' Simón Pédrona'

¹⁵Na' ka bidaogake' xsila', na'ch che' Jesúza' Simón Pédrona':

—Simón, xiin̄ Jonás, ¿achakchilo' nad' aga ka to chaki ben'ki nad'?

Na' Pédrona' chi'ene':

—X̄an', nezkzilo' chakid' li'.

Na'ch che' Jesúza'ne':

—Na'len wdap bwia ben'ka' chonlilall'gake' nad', ben'ka' nak ka xil'do' cha'.

¹⁶Na' de wchop shii wiznabile'ne', chi'ene':

—Simón, xiin̄ Jonás, ¿achakilo' nad'?

Na' Pédrona' chi'ene':

—X̄an', nezkzilo' chakid' li'.

Na'ch che' Jesúza'ne':

—Na'len wdap bwia ben'ka' chonlilall'gake' nad', ben'ka' nak ka xil' cha'.

¹⁷Na' de wyon shii wiznabile'ne', chi'ene':

—Simón, xiin̄ Jonás, ¿ana' chakilo' nad'?

Na' gokyeshii Pédróna' daa ba gok shon shii chñab Jesúza' shi chakile'ne', na' chi'ene':

—Xan', nez nle'ilo' yog'lołte, na' nezkzilo' chakid' li'.

Na'ch che' Jesúza'ne':

—Na'len wdap bwia beñ'ka' chonlilall'gake' nad', beñ'ka' nak ka xil'do' cha'. ¹⁸Dii li nia' li', ka goko' beñ' wew', gokw xalaano' to kwino' na' wyajo' kon ga wnan cho'. Per kat' ba goxoo, wli nooka' na' yiwakw beñ' yoblə xalaano'na', na' wchi'e li' ga bi cheenilo' shajo'.

¹⁹Na' daa goll Jesúza'ne' ka', bzajniile' legake' ka guet Pédróna', na' daa guete' ka' sho' Chioza' balaan. Na' ka wde golle' Pédróna' ka', chi'ene':

—Btiplaloo benlilall' nad' toshiizi.

Beena' le chaki Jesúza'ne'

²⁰Na' biyechj Pédróna' na' ble'ile' beena' sto, beena' le chaki Jesúza'ne', noe' legake'. Len' wchi'e kwit Jesúza' kana' zeelo wdaogake' xshe'na' kana' wñabile'ne', chi'ene': “Xan', ¿norakznton' gon li' lo na' beñ' malka'?” ²¹Na' ka ble'i Pédróna'ne', na'ch chi'e Jesúza':

—Xan', ¿shera beeni?

²²Na' che' Jesúza'ne':

—Shi cheenid', ni mbankz beeni kat' yiyed'. Bi sio' beena' wñeyi. Lin' btiplaloo benlilall' nad' toshiizi.

²³Na' daa golle' ka', wze dill' ladj beñ'ka' chonlilall' Jesúza' nan aga wet beena'. Per bi goll Jesúza' Pédróna' bi guet beena', san chi'ene': “Shi cheenid', ni mbankze' kat' yiyed'. Bi sio' beena' wñeyi.”

²⁴Na' beena' nake' Jesúza' txen, beena' le chakile', cho'e dill' kon ka gokə na' bzeje'n lee libri. Na' nezinto' dillaa cho'e nakan dii li.

²⁵Dii zanch dii ben Jesúza' na' bi nyojan. Shel' nyoj yog' diika' bene', chakid' bi gaki yell-lioni ikwa' librka' shel'ka'.